

元

憲

集

一



元 憲 集

(一)

宋 庠 撰

御製題元憲景文集並各書其卷首

宋庠宋祁兄弟同負盛名且同舉進士時以大小宋並稱乃其官位一至宰輔一爲尙書事業所就既殊情性亦奢儉各異故其詩文沈博新警因名隨其性之所近而爲世所傳誦則同及戒其子不令刊類文集行世亦同迨其後雖經合刊繼而仍歸散佚又同茲復裒輯成集並以聚珍版印而流傳之又無弗同其同不同之故庠與祁固無能知之余亦烏從而知之然其散也由于自欲輶晦而其聚也幸有永樂大典之僅存佚之于七百餘年以前宋天聖至今七而完之於三百餘年以後明永樂至今三則又復歸于同余因合題一詩並冠于兩集簡首更使之不同而同則向之所謂同不同者皆可勿深論是之謂大同

二宋合刊曾紀王宋嘉定間郡守王允初倡議欲合刊二宋集以屬郡文學終難晦行不負言久益彰伯也孤風標雅操仲兮強識富文章雖稱儉過及奢過弗愧元方與季方收拾碎珍得全冊吟題七字冠前行休嗤大典紛割裂愛禮幸茲存餽羊

原序

荆湖之間。國朝以來。安州爲望郡。名公鉅卿。相繼而出。元憲景文宋公伯仲。則其傑也。昔太守今右司李公。揆繪其像而立之祠。逮之強之來。請于郡而春秋致祭。亦可以夸示後學矣。然宋公之典型雖在。而文集不傳于鄉郡。謂之闕典可也。寓公李令尹之家。舊有繕本。太守今都運王公允初。昔爲通守。每與之強言。欲借而刊之。未能逮。持節京西。于其行以帑藏之餘。幾千緡。屬之強與之鏹本。以廣其傳。又分數冊以往。將以速其就也。然考之二集。旣富且贍。其言八十餘萬。工以字計。爲錢幾四百萬。米以石計。百有二十。他費不預焉。之強懼其難成。而白之今太守陳公芾。公一聞之。欣然謂之強曰。是亦予志也。郡當瘡痍之後。雖賑恤施予。日不暇給。然亦當輟他費以成之。二公政事文章。兩極其至。故能于倥傯艱難之際。而爲粉飾治具之舉。其與蓄財而不知予。妄費而不知用者。豈不大有逕庭耶。之強深有感焉。因其成也。書之篇首。以告來者。若夫贊元憲景文之鉅篇大作。則有國史在。于前輩之鋪張揚厲。而爲之序。則之強晚生。不敢措辭。觀是集者。自當知所敬歎。今之序姑記其文集之傳云爾。嘉定二禩三月上澣。郡文學陳之強序。

元憲集目錄

卷一

賦八首

卷二

五言古詩四十六首

七言古詩五首

卷三

五言律詩七十四首

卷四

五言律詩六十九首

卷五

五言律詩七十二首

卷六

五言律詩六十二首

卷七

元 鑑 集 目 錄

五言長律二十九首

卷八

五言長律二十九首

卷九

五言長律三十四首

卷十

七言律詩四十八首

卷十一

七言律詩五十九首

卷十二

七言律詩五十五首

卷十三

七言律詩五十六首 七言長律一首

卷十四

五言絕句六首 六言絕句一首 七言絕句七十五首

卷十五

七言絕句八十四首 帖子詞十五首附

卷十六

頌四首

卷十七

頌十五首

卷十八

表四十四首

卷十九

表二十四首

卷二十

外制三十二首

卷二十一

外制三十四首

卷二十二

外制二十六首

卷二十三

外制三十四首

卷二十四

外制三十七首

卷二十五

外制四十三首

卷二十六

外制五十四首

卷二十七

內制四十八首

卷二十八

內制三十首

卷二十九

內制三十首

卷三十

內制七十七首

卷三十一

劄子七首

卷三十二

答內降手詔八首

卷三十三

行狀二首

卷三十四

墓誌銘四首 墓記三首 祭文一首

卷三十五

祝文十四首 狀一首 序五首

卷三十六

記二首 碑銘一首 連珠一首 論一首 說一首

臣等謹案元憲集宋庠撰庠字公序開封雍丘人天聖二年進士第一歷官檢校太尉平章事樞

密使封莒國公。以司空致仕。元憲其諡也。事蹟具宋史本傳。史稱庠所著有國語補音三卷。紀年通譜十二卷。別集四十卷。掖垣叢志三卷。尊號錄一卷。今惟國語補音有傳本。已別著錄。餘書與文集並佚。永樂大典修于明初。距宋末僅百餘年。舊刻猶存。故得以采錄。而庠文章淹雅。可取者多。故所載特爲繁富。今以類排比。仍可得四十卷。因內有青詞樂語。不合文章正體。謹遵旨于刊本中刪削不錄。共存三十六卷。方回瀛奎律髓載夏竦守安州日。庠兄弟以布衣遊學。席上各賦落花詩。竦以爲有台輔器。趙令疇侯鯖錄亦云。二宋落花詩。爲時膾炙。今考庠詩所謂漢皋佩冷臨江失。金谷樓危到地香。祁詩所謂將飛更作回風舞。已落猶成半面妝者。特晚唐濃艷之格。實不盡其所長。祁集有和庠赴鎮圃田遊西湖詩。極稱其長。楊獵近寒巖。吼太液歌殘瑞鵲飛。句嘆其驚邁。蔡條西清詩話亦稱之。又載其許昌西湖詩。鑿開魚鳥忘情地。展盡江湖極目天。曠古未有。然集中名章雋句。絡繹紛披。固不止是數聯也。文章多館閣之作。皆溫雅瑰麗。渢渢乎治世之音。蓋文章至五季而極弊。北宋諸家各奮起振作。以追復唐賢之舊。穆修柳開以至尹洙歐陽脩。則沿洄韓柳之波。庠兄弟則方駕燕許之軌。譬諸賈董枚馬。體製各殊。而同爲漢京之極盛。固不必論甘而忌辛。是丹而非素矣。陳振孫稱景文清約莊重。不迨其兄。以此不至公輔。今觀其集。庠有沈博之氣。而祁多新警之思。其氣象亦復小殊。所謂文章關乎器識者歟。書錄解題及文獻通考俱載是集。通考于是集之下又附註曰。一作湜中集。其名又異。然永樂大典實祇標元憲集。則非湜中集甚明。故今仍舊目。不取通考。

之名焉。乾隆四十六年七月恭校上。

總纂官內閣學士臣紀昀

光祿寺卿臣陸錫熊

纂修官司經局洗馬臣劉權之

元憲集卷一

宋 宋庠 撰

賦

乾元節賦

炎歷四世天子坐法宮。憲宗軌深根寧極。遠聽高視。其仁如天。其道如砥。疊疊穆穆。爲綱爲紀。方且秋駕軫慮。宵衣致治。標甲臥鼓。張旃厚篋。至和薰而桀驚。革鴻澤淪而黜蠹。暨龜龍宅沼。牛羊避葦。民遠于罪。晝衣冠而知禁。吏久其職。保子孫而爲氏。禮無未補之闕。樂有既盡之美。日月之所燭。霜露之所墜。舉踵延頸。莫不率俾。而乃辰居乎蟻。漢宇泰乎醴粹。起真想于黃庭。遡慶源于赤水。陶鈞之所獨運。聲教之所橫被。遐哉邈乎。越不可載而已。先是有司。攄舊典。輯元命。因誕彌之吉序。稽長發之休詠。考乾健不息之象。含元長體仁之性。作爲佳節。冠于甲令。將以合萬國之歡。啓千齡之聖。掩周漢而遐蹈。齒堯顓而高映。寢明寢昌。惟天下正。則是禮也。宜我朝而爲盛。若乃仲呂鳴律。恢台御時。斗建于巳。舒將望義。授赤光照室之瑞。叶寶軫歌薰之期。內外欣踊。官師肅祇。於穆先靈。辰備宿設。善氣前應。游氛外徹。開閭闔之洪洞。廓紫宮之寥泬。飛龍抗殿。神鼉負闕。若夫宣室先帝之正寢。大火天王之明堂。啓稷嗣以辨等。率鴻臚而詔方。采物紛樹。衣纓焜煌。金匏畜響。而待叩。籥翟旌動。而啓行。庭實萬品。天幕九張。噓鑾卓馬之覲。戴斗

占雲之鄉。著丹文越効其實。毛車象載輸其祥。或布濩于外庭。或就望于西廂。其內則上宮頌老。袞衣繡裳。元侯顯父。珍圭判璋。麟定之親。信厚而在列。鸞塵之客。潔白而來翔。莫不委佩垂紳。肅穆端莊。以俟乎當陽。始乃警大庭。導初旭。纖羅靡動。羣陰盡伏。輦出于房。帝暉有穆。正法座于皇極。凝邃旋于元服。燦乎若瑤極之御羣宿。澹焉若天池之朝百谷。塗山會兮後萬玉。華封來兮善三祝。豈徒揚甚盛之節。蓋將儲難老之福。況乎鸞襟虹渚。天啓也。雖曠代而罕至。重瞳采眉。君表也。惟元聖而後備。畫堂甲觀。昭漢嫡之祚。金鑑露囊。盛唐宮之制。蓋所以謹帝胄之正統。鍾天元之粹氣。謹聲身而爲律度。聰神明而資孝悌。作我司牧。光有神器。若夫定默之至數。重熙之高致。蘊上業而未發。候昌朝而來萃。則不若是也。于是丞相奉觴而進曰。臣聞德之所積者厚。則天之所報者隆。道之所召者遠。則神之所贊者聰。今陛下尊祖襲宗。寢威盛容。退奸士以進道。斥彫纂而敦風。嚮學乎金華之殿。因心乎長樂之宮。程百斤以忘倦。慎萬幾而執中。而猶翼翼以惠迪。謙謙而養蒙。宜乎繼萬世之典業。藹千祥于聖躬。煥至德而有融。等仙劫而無窮者也。臣不勝大願。昧死上後天之壽。制曰都。此高厚之降康。宗祐之流光。俾爾熾而昌。俾爾壽而臧。朕其志哉。所不敢忘。恭舉公之觴。時左右皆稱萬歲。

幽廳賦

暗室迷陽。開疏就方。匪結錢而效飾。將修隙以闕光。森豎樞之寸漏。限橫杙而尋長。遍南榮之愛日。蔽高無之飛霜。隱几于下。陳篇在旁。含階筠之媚色。洩盤蕙之幽香。況復霽景初和。游氛外滅。輕吹襲牖。頽陽

溢穴映故網而輕明。渺方紗而洞徹。但見野馬羣飛。纖蟲族悅。或蟻蝶之上擊。或醯雞而下頤。輕若毛舉。來踰電掣。隱見互舉。如翳如空。渺倦目以旁睇。監衆態之無窮。其來也就煦以交舞。其處也假照而相攻。譬若浮埃之聚。恍如纖靄之蒙。馳驚乎蠅頭之域。游揚乎蚊虻之宮。形不在乎手搏。聲難爲乎耳聰。嗟大鈞之賦象。何至細而兼容。忽輕飄之一至今。遂消散而無蹤。

登應州古城賦

何茲城之巘岼兮。據東北之山巔。扼三關之走集兮。眺七澤之敞閒。喬木矗其雄立兮。森葦葦而刺天。翔風薄而長吟兮。雜下瀨之潺潺。南陵漸其峻屹兮。盡渺渺之雲烟。于是太陽啓暉。六幕澄霽。春塍如繡。春樹如菁。啼鳥壞堞。蒼烟故壘。登高遠望。使人心瘁。在昔峻宇層構。雕粉繡楣。車爭水度。蓋逐鴻飛。鼓鐘沸涌。冠劍陸離。抗障日之長袂。豔從風之羅衣。至矣哉。合從締交。結儔附黨。兵略地而鼓行。師椎牛而人饗。梟鳴牙中。梯舞樓上。出萬死而徇國。俟千級而邀賞。莫不光沈景滅。魂斷心折。千蒿斂魂。野薤凝血。同枯骨之死。安知舉堯而非桀哉。但見灌叢宿楚。奧草多露。城狐不薰。臺鹿時聚。虎肉委蹊。豺牙當路。狄失木而號煙。颺投林而嘯雨。遇發冢之詩書。對憂心之禾黍。曲池旣已平。高臺又以傾。古塹時見。荒榛自生。叢祠陰塢。虛聞松聲。凝睇弭節。悵然內驚。嘆人事之遞遷。孰長年之能執。壯率歎以俱往。耄引悲而前集。昔牛山之妄歎。顧二臣而飲泣。使爽鳩之無死。非吾君之所及。諒迭處而迭去。同寒暑之相襲。況乃僕本恨人。觸感增慕。歲月逝矣。江山非故。古旣古而嘗今。今雖今而將古。天愁人兮安寄。日難揮而催暮。命僕失

以効駕。吾將遵乎歸路。

夫人城賦并序

昔晉將朱序守襄陽。爲苻丕所圍。序母韓氏。自登城按履。謂西北角當先受弊。遂領百婢。及城外中女丁。于其角斜築二十餘丈。賊攻西北果潰。衆固新城。丕遂引退。謂此爲夫人城。至今叢祠遺基。巋然尙在。荆楚歲時。鄉人祀焉。仰其高風。慨然爲賦。其詞曰。循漢臯而西望兮。何層城之孤峙。披南烈之遺堞兮。號夫人之故壘。譙門堙而中塞兮。灌木森其相倚。勢鬱律以上出兮。下坡陁而榛圯。渺遺烈而未泯。眷高芬而可紀。昔典午之鼠首。屬苻丕之虎視。區區保乎江漢。峴一障乎北鄙。寇方甚于餓喙。地幾同于黑子。惟韓嫗之慈訓。勵朱公之朴忠。仗天節以扞敵。據江域而臨戎。于時大羽若日。高旌如虹。桀黠同侮。跳梁四攻。防地中之璽岳。舞樓上之梯衝。伊君母之慷慨兮。誓喪元而靡悔。臨大難而克壯兮。懼危闔之先潰。率民婦而操築。培戰陣而相對。備之于條侯之西北兮。豈神機之我昧。果前蹈于厥角。率圖全于覆簣。嗟女子之綿薄兮。蓋中壺而是修。奉蘋蘩之常祀。承巾櫛之餘休。矧仗節而死難。非君子而可求。偉此母之挺操。亘終古而弗渝。趙指括以全宗。王勉陵而事劉。孟三徙以漸訓。介俱隱以無尤。雖先建于高躅兮。我無忝于前猷。若乃寶壙百尋。犀兵萬旅。推轂受命。建牙作輔。氣可蓋世。威能拉虎。或啗利而忘義。或飽飛而背主。輸天險于敵國。屈王國于亡虜。悲丈夫之竊號。曾緯鞅而無取。儻死者之可作兮。非夫人而誰與。詠明德而不已。聊盤桓以延佇。

嘯臺賦

梁城南下。陳留右鄙。環道卻走。繩阡直指。控鄭邑之遺墟。得阮公之故里。抗孤臺兮數仞。撫頽垣兮百雉。木蒼蘖兮冠巔。棘棧棧而蔽趾。息予駕于肩阿。披微徑而周視。坡陁隱軫。沿緣徙倚。徙倚兮奈何。懷人兮几多。昔當塗之失馭。感羣俊之同波。予生不辰。道方薦瘥。呂鴻軒而被戈。嵇鳳舉而嬰羅。惟正德之思免。潛葆光以內照。狹世路之多辟。兆天衢而觀妙。悟跨俗以遺累。喜憑高而臨峭。于是戾止斯臺。愜悅徘徊。叩神谷以抽緒。憑鸞嘯而舒哀。其始也。創韻乎一氣。其徐也。淪響于九垓。吟將斷兮復尋。意彌往而逾來。志念君而宮轉。心感物而羽摧。激清飈于萬竅。納素氣于元胎。精感飛潛。氣周動植。天籟停響。龍吟輟息。獸將聘而柱喙。禽當飛而墜翼。寧蓄久而必愬。將愬之而未極。悲乎萬化弗停。遺基欲傾。桑冒田而非海。蕪隱壁而疑城。轍雖窮兮罷哭。酒徒美兮非醒。邑何知乎南巷。土奚樂于東平。但見豺獮狐語。梟翔虺驚。雉鸞嘯而輩作。屬離離而孤鳴。覽陳迹以遐悼。莫髣髴乎遺聲。已矣哉。儻九原之不作。信豎子之成名。

瑞麥圖賦

天聖之六載也。陪京近地。宛丘奧封。厥有瑞麥。飛驛聞上。是時邦英臺彥。鴻儒碩生。被歡誦以沓臻。樂千齡之希遇。餼臣不敏。敢揚言而賦之。曰。何聖辰之有感兮。見造物之流形。伊嘉生之育粹兮。亦稱珍而效靈。蓋茂昭于豐兆。故絕出于祥經。是月也。候司標怒。節紀朱明。司徒謹土宜之法。遂人勸時政之程。吠畝鱗接。田疇砥平。非滅裂之攸縱。竟疏濬兮資生。青青交秀。芄芄向榮。或散穎兮共幹。或連岐而並莖。顧我

疆兮我理。悉如坻兮如京。民相勸而勳色。士覲奇而震驚。俄具載于繪事兮。亟傳聞于禁庭。寔惟天之輔德。彰有言而順成。若夫冀草標祥。朱英薦異。茅三脊以儲祉。芝九莖而表瑞。信徒假于書稱。亦鳥足以擬議。請言瑞麥之可嘉也。協氣交生。大鈞封植。表天祐之孔昭。顯坤珍之有絕。宛彼神區。契茲景則。嘉種肇靈。秀穠敷色。浸潤兮芳澤之和。鼓動兮薰風之力。餘糧雲委。滯穗山積。故陳陳而相因。亦穰穰而叵測。宜乎允膺帝寶。紹隆皇極。豐功大業。日躋兮著明。溢美連休。月書兮不息。願蕞陋之微才。曷揄揚于盛德。

感雞賦有序

予寓居畿邑。有里中男子蔣福者。多畜羣雞。內一雞三足。其一足拳而弗用。一雞獨足。能飲啄嬉戲。與羣雞上下。噫。祥眚之事。予不得而推。但感其物理之異。而爲賦云。伊元化之無私兮。播羣形以平施。紛肖象而寓質。若巧鈞之制器。鱗者俾夫沉泳兮。角弗施于猛鷲。引羽族而普觀兮。足惟兩而已備。苟損益于天分兮。匪生生之本意。何此匹鷄。埋絕常區。或蹠蹠而獨止。或疣贅而聯跣。並鳴翔于墟坎。亦飲啄乎庭隅。徒觀其一。則綴不用之爪。牘無名之膚。象非同于海鱉。名有忝于陽鳥。其一則踐孤立之危。靡全形之德。追山變以同號。希商羊而並翼。寧真宰之好異兮。伊微禽之我惑。感天分之有常。循生涯而各得。不決拇而齧枝。詎日黔而浴白。蚊百足而蛇憐。蚓無心而土食。將滅此而益彼。懼速尤而長慝。姑美惡之兩忘兮。庶元和之來宅。

德車載旌賦〔案〕此爲永樂大典所佚。今據宋文鑑及文翰類選增入。

君有至德。時乘大車。當偃革以無外。乃結旌而有初。奉駕陳儀。采物雖資于備設。鳴鸞示禮。旂旄匪俟于垂舒。順考前經。鋪聞往說。謂戎事以既息。貴君車之有結。雍容撫軾。蓋藏飾以尙純。肅穆展鈴。詎垂旒而就列。蓋由抑乃盛飾。昭夫令名。雖冠品于輿服。蔑揚威于旆旌。肅軫無譁。方斂藏于旂厲。馳輪有度。靡赫奕于綏纓。且夫禮有質文。器隨用捨。車號乎德。則崇化于邦本。旌結其表。則示人于天下。意自象見。名非人假。君軒弭節。孰訝乎卷而懷之。國乘制容。益顯乎素爲貴者。是知車之用兮。充德以成大。旌之飾兮。輔威而孔昭。旣武怒之不作。信軍容而外銷。組轡啓行。陋郊旄之子子。錙衡遵路。殊風旆之搖搖。若然則動有森儀。文無異色。雖嚴駕以備物。終去華而表德。故使禮典攸重。民瞻不忒。皇皇整御。始中括于采章。檻檻肅容。豈外揚于藻飾。用能上載明德。旁昭緝儀。自駕言而戾止。殊幅裂以藏之。升降惟寅。僅比非心之屋。章明盡屏。寧同止獵之綏。大矣哉邦禮是崇。帝儀資始。實務德以垂教。必收旌而昭理。宜乎國容備而兵器銷。率由茲而盡美。

元憲集卷二

五言古詩

正月望夕供養大阿羅漢畫像作

端月戒熙陽。望舒秀圓極。洗心乘佳節。瞻像洗慈德。穆穆屋漏尊。虛堂與神寂。繪境紛自奇。法性非所得。人貌含天虛。髣髴若真覲。示現隨三界。精感超六識。華燈列清場。寶炷熏梵席。妙意隨春融。疑懷逐冰釋。欲讚已忘言。拳拳自終夕。

嘯臺

孤壁橫天畿。巋然表尋丈。恭承晉高士。嘗此據遐想。臨風挹勝軌。意若無今曩。當塗昔戰龍。典午方構象。忠賢履危渾。鱗羽嬰密網。烈烈熾邦刑。耿耿翦人望。嵇呂膏磔斧。濤舒受羈鞅。先生機且神。妙用包羣枉。兀爾謝將迎。隤然寄昏放。禮法雖我讐。智恬非外獎。惻愴廣武游。留連步兵釀。竭來桑梓國。憑高念長往。舒嘯萬籟先。浮精九皇上。歸禽宛頸還。秣駟臨芻仰。當日天地心。寥寥其悲壯。咄嗟涉千祀。隱軫存遺壤。臨岸知是非。俎豆猶彷彿。邑東故祠在焉我來一傾耳。城隅斷餘響。梟鶚愁空林。狐狸語平莽。高韻邈已徂。清銘復誰賞。唐人獨孤及爲嘯臺碑銘。近年邑人淺池得之。嘗聞史氏傳。塗窮輒招恨。正人與直轡。何代非流蕩。淳風日已微。投辭謝精爽。

入謁馬上作

殘月擊鼓喧。中衢憶輪駑。九關忽洞開。萬蓋默雲布。燭亂建章星。塵迷華陰霧。車輻避鳴騶。鑾音聽朝御。嗟予亦何爲。遙此珍羣羽。野鶴載軒愁。狂狙裹衣怒。肅穆未央朝。蹢躅壽陵步。人生固有志。躁靜各成趣。生當伏農畝。乃爾汙賢路。峨弁束蓬頭。吞腥滿飢嗔。樂育過阿陵。增裨乏塵露。徒懷一割志。但恐流芳暮。且復埃逡巡。南山有場圃。

習彥威

四海習彥威。英英出江漢。高韻凌風翔。雕文奪星爛。感激陽秋辭。姦雄非所憚。蜀弱自爲正。曹強乃名亂。陰忤柄臣意。飄然去恩館。驅車自北門。四顧興長歎。終焉謝病免。猶得爲人半。緬矣身後名。臨風寄悽惋。邑子夜宿話余先疇蕪廢。

臨邛久倦客。彭澤賦歸來。念我何爲者。趣時良殆哉。一身仕東觀。三載寄靈臺。望見故鄉樹。頻更緹筦灰。曉車愁蹇蹇。春耜負莓莓。虛名自韞鎖。豐壤成汙萊。日想社枌老。心知門柳摧。神阡迷馬鬣。栢表被狸災。一聞里人語。夜靜成多懷。他日還燕泣。前憂成誤哀。

留別知郡職方楊員外

予本草茅士。世無鐘鼎榮。在昔未勝冠。先疇弓冶傾。茹荼濱十死。屬纊存微生。分遂甯牛飯。誰希莊鴈鳴。龍具泣妻子。練裙悲弟兄。慈誨斷軻轍。遺書開晏楹。感激侏儒飽。呻吟裘氏聲。下武纂丕構。協風翔四瀛。

粉馳資丘帛。高堅當衢旌。鸞翻不暇戢。驥材方自呈。車徒首燕路。冠蓋溢秦京。文章趙元叔。唇舌婁君卿。列邸曳裙入。羣公交幣迎。僕嘗不自料。奮迹希時英。弟子許都養。詞人嗤老僧。一旦褐衣召。千慙昆玉名。安知軾蛙賤。但覺軒鴻輕。初命六百石。漢廷尉平關掌列侯城。居然憐操決。無術裨澄清。天炎屢來集。冤獄紛以盈。僕在局以來。水旱爲沴。各再茲吏受賕者。一請讓使臺檄。流離民屋征。結課諒無最。黜幽茲有萌。晚遭金閨彥。傳瑞提千兵。爲僚篤古義。賞善多新評。坐則席函丈。出則車連衡。高論天人際。細略米鹽爭。愚慮或窺管。嘉言茲報瓊。賞音非易遇。曠古難爲并。嚴惠不世出。蕭朱猶害成。何言末路日。獨契後周情。累洽帝圖盛。思皇賢路平。願言寄君子。始終同所營。

獻臣學士與余通書因成感詠

夫君班揚儔。抱槧羣玉府。久讀未見書。躬抽繫年譜。墜緒獲先秦。亡篇出東魯。上泝三皇墳。旁採百家語。怪牒汲郡來。幽經茂陵聚。英哲資繕藏。緹油盡刊補。蒸青勁竹殘。削誤規刀苦。種別踰九流。星羅軼千部。顧我寡見聞。蒙薰異倫伍。祕帙樂共披。譌文許交舉。家握互紛綸。郵笥劇旁午。初無班嗣嗤。更免許慈拒。矧余羈官久。寂寞緊茅宇。禮乏贈酒紙。疑增照觴怒。尙賴啓新編。時時發豐譜。

予自到嶺外。居嵐瘴中。未嘗不以先死對治。人人見其浩然。若有所得者。今歲在海外。遇寒食。因發家書。想望松楸。不能自理。偶成此詩示兒子。

春日自明霽。我心何鬱傷。草木競芬菲。飛鳴自頡頏。悄悄坐書幌。幽幽宴空牀。既無功名念。反音思白晝。

長愁來不自持。零落鴻鴈行。三過解澤流。六見槐柳黃。最憐小兒女。路遠不得將。生還一笑喜。死去埋他鄉。生死如循環。我師佛老莊。感此寒食節。新烟過鄰牆。松楸渺雲海。目極摧肝腸。書成附鱗翼。不如永相忘。何以慰目前。作詩示阿張。阿張孟堅小字。

左散騎常侍東海徐公

徐公眞丈夫。不獨文章伯。江南兵未解。主憂臣慘戚。公願紓其難。苦求使上國。庶獲一言伸。少息苞茅責。其君驚且歎。執手涕沾臆。謂言知爾晚。何此忠義激。天子叱在殿。誚讓雷霆赫。公亦從容對。曾不渝神色。仁者必有勇。斯亦古遺直。書大略其小。我有春秋癖。所以此詩中。不言公翰墨。庶警事君心。勉旃希令德。夏日晚出芙蓉堂

哲匠昔締構。

故相文惠陳公所建。

文榱面清池。回環水光合。左右雲容披。蒼烟限壘斷。空碧盈軒垂。蕙綠不待染。荷圓皆中規。戲魚觸新藻。幽鷺翹空坻。初筍半遺籜。殘跗猶抱枝。我來冰未泮。條此亘炎曦。節物一以換。余懷焉獨怡。內漸固陋質。本乏廊廟姿。印綬紛璀璨。旌旄森陸離。林狙裹華黻。野鹿駭金羈。負山力已竭。傾日心空疲。知此危殆辱。斯言非我欺。橫琴不成調。慷慨念歸期。

秋晚禁廬獨坐

霜日薄西牖。境寂趣自閒。風篁宿天籟。海碧沈雲山。宮樹未全落。棲鳥相與還。心疑蹈虛宇。跡乃塵清班。自顧丘壑志。何施軒冕顏。終當謝緋服。戢翼榆枋間。

孔明

漢家亂無象。賢才戢鱗翼。武侯羈王器。隆中事耕殖。堂堂劉豫州。介紹徐元直。一聞臥龍譽。三駕荒廬側。士爲知己用。陳辭薄霄極。說吳若轉丸。抗魏猶卷席。談笑馭關張。從容羈梁益。持邦二紀餘。君臣絕纖隙。浮埃蔽穹壤。大節淪金石。梁甫不復聞。懷賢涕霑臆。

筠亭

歲晚檀欒委。山中映孤宇。聲繁天籟吟。影動仙幢舞。卽境是真如。黃花間幽圃。

嘗假馬于親舊不獲因感而成詠

東方昔借車。尼父嘗假蓋。一馬茲不全。夷涂出如閤。人無托乘寵。朝罕均茵載。策足本乏謀。臨風嗟有待。京洛富華廐。權奇出青海。翩翩陌上郎。滅沒爭星邁。珂音雜鸞響。羈勢動霞綵。東郭獨何爲。徒行履將敗。穀城主簿王崇者。少得養生禪寂之道。中年棄官入漢陰武當之間。邈與世絕。又有吳人山者。自遠攜母與王同隱。時余方貧病。慨然慕之。因爲詩代書以寄二子。且托王尋耕釣之地。相與邇者竝以敘懷云。

余本丘壑人。失計蹈塵網。軒冕忽韁鎖。風波若流蕩。高羽顛宏羅。奔驂僨歸鞅。衆僞緣境滋。千憂共身長。進乏汗馬勞。居畏濡鵜賞。力命頻遘迤。幽憂思獨往。聞君集漢陰。遁世久忘象。因溜爲鳴琴。憑巖作煙幌。復有延陵季。亦善南越養。築宇近親仁。耕田或歌壤。且言掛瓢處。一徑捫蘿上。杳若御風遊。蕭蕭骨毛爽。

芝朮紛異苗。麝麝結幽響。老木森千尋。丹藤垂百丈。洞谷答嘯歌。雲霞代隣黨。咨予倦遊者。緬邈期眞賞。之子幸我憐。試煩翦幽莽。儻獲蝸牛居。卽謝海禽響。時從漁父魚。聊植仙人杖。漸脫區中緣。永託無生獎。

和答李學士見寄長韻

璇源多清派。蘭谷無絕芳。之子相門裔。高才映周行。妙年弄文史。雅志含圭璋。中歲困官簿。銖兩爭低昂。一通金閨籍。荏苒潘鬢霜。剖符屢壓阮。執戟更疲揚。聞君近多暇。歸偃三經堂。左右褫紳組。縱橫羅巾箱。安驅仁義塗。引節名聲場。戰酣道始勝。心泰無羶尪。壯思挾飛藻。詔我臨霞章。我時坐鈴閣。寂寞如禪房。開緘一快讀。雋味腴且長。高義溢句流。清風隨篇翔。感人不無意。在水河湯湯。吾匪辯音者。空冀懷仁藏。矧屬歲躔暮。百卉皆芸黃。何以謝君子。松柏同蒼蒼。

和答吳充學士見寄長韻

多士秀王國。珍羣驚天衢。其間延陵季。煜煜承華跗。盛藻班蔡流。芳年終賈徒。籤芸擁石室。札綈紛鴻都。刊僞富清暇。壯思彌天隅。投我塵外什。粲然風義俱。幽襟恣申詠。不覺頽陽烏。渴吻漱仙液。饑腸涵道腴。衰翁牽夙尙。騷雅嘗馳驅。疲足道雖頓。流波心未渝。過門輒大嚼。臨博猶狂呼。詎云獲眞賞。聊復愜所娛。矧繁絕唱贈。無脛來明珠。報之乏瓊玖。寶玩徒區區。

歲晚許昌城隅登樓作

孤城何巘岼。西北有層構。我來一長眺。正迫歲陰候。嚴風挫萬物。霜雪復交寇。冬日苦易頽。義車劇馳驟。

霄月不相讓。空弦映矢彀。潦收陂面闊。水落山骨瘦。生平丘壑心。顧慕獨延脰。箕峰紫氛結。潁瀨瓊波漱。想像逃名夫。幽居翳仙竇。願言追遐蹤。人間謝譏詬。

天禧初僑寓安陸有宅一區嘗于齋前手植橘樹纔尺餘許未幾擢第隨牒遊方天聖庚午冬屏居

畿邑守舍兒自安陸饋余丹橘一筐因曰此卽齋前所植撫物懷舊淒然不平者久之因成感詠

昔年封藥栽。生意頗柔脆。今茲見丹實。落落如星麗。斯果號難成。常踰豫章歲。此木不十孤根何爲者。尙

記吾廬地。蔽芾詎因棠。連蜷乃同桂。厥包千里遙。守舍重緹惠。金顙照病眸。霜津益瘠肺。卻算去里年。十聽秋鴻唳。無復陸續懷。寧圖李衡計。他時攀樹悲。詎減金城涕。

歲晏出沐感事內訟一首

山海有完士。希世無良籌。偶穿東郭履。遂別野人舟。不恥篆刻賦。來肩英俊游。私智甚鳧短。塵容若鴟愁。備員太史氏。補屬富民侯。(案)漢書田千秋封富民侯唐人避太宗諱改民爲人此詩原本作富人今改正姑學了官事。何嘗分主憂。日貪斗食利。歲感星墮周。中都富才彥。方駕若龍蚪。茂先喜史漢。平津治春秋。高文用司馬。格五寵虞丘。問闔路逢葛。繽紛人召鄒。桑羊興賈豎。安國出縲囚。汲鄭貴交盛。徐陳英藻遒。況乃天下樞。雄雌來九州。衣冠徑復道。鼓吹出長楸。席上萬錢箸。橋邊八列驄。雍容緩魯袂。意氣拂吳鉤。咨予良不逮。瓠甕廁珠璣。吹竽昔已濫。在梁今可尤。臺閣魏舒被。風霜蘇季裘。有志謝軒鶴。無機防海鷗。擬竣杜陵課。誅茅歸故疇。

送上元勾簿吳昌卿

長安琴鼓喧。里舍隙塵曉。有客駐歌驪。歸途指江徼。晨庖爨蘇冷。窮巷鄉輿少。乃肯顧我廬。歡言復悲嘯。悲嘯誠易知。夫君韻經奇。才高洛陽賈。賦動楚湘壘。平昔應賢詔。覽德揚英蕤。孚尹傾寶肆。沛艾絡仙羈。獻書北闕下。對策東堂垂。逢吉旦兼暮。諧音埴且篋。天官選初筮。黃綬聊藏器。三釜樂及親。尺檄甘爲吏。邇來預冬集。再調鬱奇意。羣公亟爲言。力命乃相戾。奏牘輒報聞。官書責勤蒞。簿領百里佐。風煙六朝地。銷魂南浦行。拄頰西山氣。君子永來譽。勝襟無累歎。行矣勿載譁。鄉枌方省家。春橈碎溪月。曉颿弄江霞。長洲紛藉草。故樹雜生花。予心若爲處。歲晏竚疏麻。

京師故僚以余退居近畿數賜存問因敘懷自感

病餘頗厭肉。欣得僧廬蔬。僧牕亦明潔。可以觀我書。弟兄冷相對。因著柏酒醉。酌餘欲拈筆。狀乃爾狼狽。我老固有素。未至形茶具。其事故可知。寧復論年數。阿連吾語汝。我計當何取。學道旣無成。何如事農圃。

冬至攝事南郊齋宮感懷作

履至謹冬祀。攝職叨上公。洗心奉明誠。祇宿城南宮。芳歲正逾莫。熙陽殊未融。西郊淡頽景。北牖來朔風。驚野騁歸獸。緣雲號征鴻。夕坐無晤言。情條結深衷。自撫韋布陋。奚堪廊廟崇。觀瞻動衆目。跼蹐愁我躬。自古經緯才。因勢猶汗隆。夔高值虞奮。孔墨遭周窮。如何一介士。蔑著橫草功。仰被天宇施。遂濟人爵豐。較能劣涓瑤。荷寵踰華嵩。物理自非是。神鑒安可蒙。區區謝病志。終冀回天聰。時已上表乞退。

念衰二首

勁風吹北林。落葉舞南牖。歲序忽已高。崢嶸薄星斗。大化驅羣物。始終迭相授。義和亦何爲。挾日但西走。少壯馳目前。衰頽躡人後。星星兩霜鬢。伴我老成醜。學道苦嗟晚。捫心更餘咎。茲意將奈何。投身就杯酒。衰容覽青銅。寒光了無隱。照我顛上毛。星星罕餘鬢。持此將奈何。歲月屢逾盡。少壯罕聞道。下士乃爲哂。操綆遽汲深。持矛復夸楯。任重力疾顛。塗窮計方窘。上孤明主恩。下違昔賢準。憂悔從中來。老至非無睚。尙忝麾守尊。居慚政條敏。孤心企寒柏。萬境付朝菌。往失奚足追。來戒或堪引。明發丘壑情。予將治歸軫。

湖山

空水渺澄鮮。蒼山復盤踞。沙草媚苔磯。雲柯抱巖樹。畸人茲與留。脫世如遺屨。

登大明寺塔

故歲搖落時。憑高望揚越。流光不我與。復此值凋節。孤塔踞層岡。仙盤湧滲沱。病足攀危梯。寸晷或三歇。浩蕩佛界寬。凌兢客心折。遠岫幾培塿。空江一明滅。海日棲簷題。霜風語鈴舌。荒墟自今古。大塊靡封埒。豁若醴覆開。醒如豆聰撤。哀哉人間世。小智互紛結。豕彘論是非。蠻蝸定雄傑。俛俛百代俗。唧唧九流說。推致無窮中。秋毫共飄瞥。聖人小天下。樂意遺來哲。矧余蒙鄙姿。輕蹈榮利轍。溷濁六塵并。謹叟太和泄。薄言真境游。追悟生理缺。洗心刻來誓。同步懲曩跌。甘露多餘滋。聖關有幽鑄。咄嗟朝市人。此路非爾躡。

哭公實學士

高子北方士。才爲國之華。靈襟絕塵藻。麗藻紛春葩。雖云服韁鎖。高意籠青霞。子昔久蒙潤。逢辰亨乃嘉。

聯飛奉臺閣。相顧引龜繻。鮑叔不予怯。楚臣寧汝瑕。詔書頻出沐。歸轡屢回車。時過蔣生徑。或詣子雲家。柏將松竝悅。人與室非遐。自謂百年分。風期何所嗟。君命良不淑。浮生茲有涯。沈疴犯霜露。幽讖發龍蛇。美志一朝盡。餘哀千古賒。招魂知是否。生肘詎眞耶。塗斤失郢匠。膝席天長沙。青黃飾溝木。藩樹墜風花。世事一以謬。何言定隆窳。都門執謳紼。原路引哀笳。夕雲旌外慘。春日塚頭斜。自此掩瑤軫。其誰知伯牙。

壬子歲四月甲申夜紀夢

積雨暗長夜。山行經險巖。悲風撼林木。崖谷蔽參差。遠聞豺虎號。鬼燐弄光輝。十步九失足。中心祇自持。所適旣迢遞。眈勉焉可爲。道旁見明燭。抵宿依茅茨。開戶念生客。喜逢主翁慈。煖湯趣妻子。然薪爲更衣。艱難又奚怨。少息非所期。雞鳴夜將旦。熟寐百無知。欣戚一以忘。何有安與危。生死宇宙內。曠懷亦如斯。聊紀夢中事。誰當廣我詩。

過曹氏墳庵在潛院間蜀僧修靜自天柱退居于此

出郭屏僕從。取徑問樵牧。短松新被岡。青嶂遠遮屋。雞犬無四鄰。日月自兩轂。阿師厭機緣。脫迹謝塵俗。是心大圓明。一室了具足。汲泉烹細芽。支鐺炊脫粟。默坐契從三。諸方付藏六。我來同友生。得飽徑眠熟。稍爲微風醒。已歎畏景促。買山知幾時。所惜負松菊。

水月

湖上纖羅收。天邊夕蟾映。皎潔銀界寬。虛明佛心定。可愛不可持。乾坤共孤影。

余臥病畿邑御史王君假守潭楚道出于舍下特見存訪且尋先子之舊欽承風儀因爲詩抒感云
病客臥窮里衡扉掩殘春。墮官道家藏竄跡農圃民。朝羅噪饑雀暮席流芳塵。尸居悅踰歲踵息動彌旬。
忽訝絳鞬隸傳呼越郊畛。蹀躞千餘騎雍容兩朱轡。言是楚邦守來過安邑貧固宜辨貴棄乃爾存艱辛。
此道古爲重餘風今已淪。物色認平素載言接慙慙。始悟先子舊早篤嘗僚親孤心極摧櫓感涕浩盈巾。
追念舞勺歲已識棲鸞人。景德中余侍先子爲弋陽督郵時勾稽屬邑始授余以學術師筵奉函席學舍操書筠童牙自忘醜詩鉢或
娛賓公時摘句賞謂是天麒麟親璧彩牋贈勉我期日新。君嘗作詩取余多所獎勗汝南丐題品有道定人倫白爾一
啜刺中年嬰世紛天聖紹休緒頓網橫無垠鸞鵠不藏翼蚪蝸無遁鱗余時濫隗始驤首摩蒼旻司徒揖
元叔天子第平津甲科廷尉屬再命宮坊臣黃香入東觀賈誼過西秦紉繹金匱室珥彤瑤水濱登瀛識
褚馬頌漢希淵雲一朝泣風樹九死存餘焄中都索米後老圃種瓜辰惠然下車揖高義傾前聞卻計髡
髻日二紀如逡巡今形雖隱几昔訓尙銘紳丈人篤求舊媮俗將還淳湘水澹蒼野衡峯凌紫氛澤節首
南夏瑤蜺瞻邃宸戀闕魏公子弔賢楚靈均公懷佐時略宜樹光朝勛奚爲遠問俗惜此徒傷神宣室懋
清問華光欽寶鄰行行愛玉體趨節竚來臻

去年三月楔飲池上歲月易得忽復暮春因再宴僚屬作

前茲屬元巳置酒蒼烟臺芳序忽復周春正風徘徊。惟言速僚友亟使具觥盃。長渠溢芳溜列坐浮香來。
靈囂合衆樂隱若南山雷。舞袂紛維襲賓冠儼崔嵬。美人前爲壽顏色如瓊瑰。況我千萬日行樂無疑猜。

新歌曩天衢。興視行雲回。我時語四座。茲賞誠難哉。妙顏無再朱。白髮惟相催。跼蹐盈聖智。孔顏罹憂摧。區區百世後。美惡同塵灰。吾欲挈瑤斗。踞海爲金臺。挹茲忘憂物。與爾同嘲諧。天地爲一朝。長短何足哀。魯陽久不作。白日任西頽。

奉詔止雨宿齋建隆觀

漢家候神館。奉詔禳沈災。解纓就齋幕。恍若躋蓬萊。雲羅絳朝鳥。露掌承仙杯。衆眞拱象帝。寶宇正崔嵬。爐烟薰太虛。重陰爲之開。單枕不成寐。俗魂自驚猜。心迷坐忘術。萬慮無根來。天雞殊未鳴。霜鴈有餘哀。借問麋鹿姿。云胡塵國台。構極謝隆棟。裨山劣纖埃。上漸稷契名。下愧丙魏才。惟餘止足戒。臨路空徘徊。

念古

賢哉邴曼容。出處知所據。官餘六百石。輒自移疾去。富貴非不懷。殆辱亦先慮。嗟我材下中。叨恩最蕃庶。堯庭納言職。軒野方明御。服袞作槐班。曳履南宮署。雖經斥免詔。尙玷高華處。昌黎反徒有守直弦。何能借前箸。愚甘六馬對。讒恨三物詛。年來感衰疾。倦鳥思返羣。抗心望先哲。俯首慚昔譽。西景尙可收。歸轅未云遽。儻以人望人。期君或吾恕。

己巳歲除夜有感

明晦互推斥。中都芳歲闌。星迴迫舊次。簫暖送餘寒。來辰繭有緒。去境環無端。天運故相易。人心那獨安。懷此不能寐。攬衣強盤桓。疎恐緩餘帶。危惕整塵冠。耿耿燭焰直。淒淒霜氣酸。城頭殞高木。庭下敗叢蘭。

撫臆累新欵。掩觴沈故懽。況乃蹈世網。虛名爭控搏。挾冊濫書府。振纓玷王官。東序羅圭瑞。西雍集鷄鸞。昏瞶眩寶肆。短翼廁仙翰。縱爾值藏疾。何容久素餐。泛泛騷客鳧。坎坎詩人檀。寧無要路津。所畏在蹢躅。枳棘附驥尾。緯蕭戲龍蟠。寄語拙艱者。無埃學邯鄲。

王粲

秦川貴公子。避地來荊州。流離世道喪。簡脫天姿遒。歲時不我與。假日賦銷憂。妍辭縟非霧。逸韻鏘鳴球。曹師下南服。置酒臨滄洲。慷慨前爲壽。高譚王霸籌。歸來奉丞相。攝組登華輈。獨步今已矣。空餘清漢流。

漢將三首

漢家開絕域。日夕羽書聞。朝那殺都尉。北地敗將軍。沙明疑晝雪。氣黑似秋雲。片月就城偃。長蛇隨陣分。冰藏馬窟路。血沫劍星文。直置鴻毛命。聊圖鱗閣勳。

頻年隨校尉。晚節事輕車。瞻烽數奔命。辭第詎爲家。輕齋絕瀚海。間道襲昆邪。雙鞬朝負羽。三鑿夜鳴笳。金虜先雨覺。蓬鬢後霜華。如何差六級。遽使抱長嗟。

薄伐乃中謀。和親非上策。匈奴負漢恩。男兒喜邊檄。故歲出定襄。今年救張掖。沙平落日黃。月迥遙峯白。急擊右地兵。連俘月支馘。幕府省文書。家人非尺籍。夜拔五嶺旗。晨追六驛迹。陛下焚謗書。孤臣勒燕石。

雨夜秋興示仲氏子京

秋律盪華序。濃雲生夕陰。羣芳伴雨泣。百竅隨風吟。衰螢滅遙徑。倦翼翔故林。暗隙濕已逗。孤燈青欲沈。

愁人此遙夜。萬慮集幽衿。歡緒未盈尺。憂端已越尋。借問所以然。出處謬素心。家世本丘壑。才具非瑯琳。靈根夙已殞。野服良所欽。蹇芝幽澗畔。擲鰲故溪潯。歛爾濫官牒。今焉旅華簪。兄弟見羈鞅。交朋賴幽箴。爾講壞壁簡。我攀羣玉岑。嚴枚交逸藻。潘陸嗣清音。羣才方構厦。短綆徒汲深。狂迷頓纓鹿。踉蹌乘軒禽。歸來翳編翟。況乃貫愁霖。求薪動踰桂。鬻賦靡酬金。原病固爲累。朔飢非所任。猶欣共姜被。歲宴樂愔愔。

寄題職方周員外廬山笑臺

員外九江人。嘗游憩于廬山之陽。自謂太平之民。樂道逢聖。造適輒笑。因以名臺。後爲二千石。過故里。鄉人葺其臺。且旌賢者之致。

周郎有舊隱。遠在南山陲。一笑偶爲樂。九層遂成基。旁連醉令石。卻眺社僧碑。謝康樂所撰。遠公碑。今在廬阜。地遠雲物秀。巖深松桂滋。當時驚高興。益友相攀追。樂聖自鼓腹。談經亦軒眉。風猿助清嘯。谷鳥參朋嬉。忽引朝闈籍。久乖林下期。頭白二千石。高蓋復來思。活活弄新溜。蒼蒼援救枝。雖云未投綬。良足紓煩疲。余懷本丘壑。世路方羈羈。願言獨往客。緬邈心空馳。稅駕或未晚。從君歌紫芝。

歲暮北亭懷子京宛丘二首

歲晏坐孤壁。心馳千里餘。何言共被樂。方歎專城居。野闊江海漫。風高天地虛。願言逐歸鳥。無翼將焉如。搖落江都城。風塵宛丘道。天涯遙相望。離思何草草。迴澤騰麀麋。滄洲叫鳬鵠。星歲日云徂。在原歎方浩。

游山簡習池

昔日白接離。時時詣諸習。累榭今已頽。清池尙堪挹。遙源乳竇響。其源出鳳山白馬寺。泉聲咽絕可愛。敗防流沙急。況復蘭蕙時。幽香遠相襲。

魚梁亦曰槎頭在規津上水落時洲人攜竹木爲梁絕流以捕魚

八月霜潦收江槎絕烟渚竹落如網裁淵鱗劇雲聚鷺鳥爭食飛兒童荷叉語去乙鰕項肥吳羹免轅釜

七言古詩

正月望夜聞影燈之盛齋中孤坐因寫所懷

漢家太一昏祠日寶炬神燈徧京室仁壽先從殿裏開纖阿正傍樓前出傳聞陌上樂康年寶騎如龍人若仙騶驪始見斗城曲爛熳還逢星漢邊妍歌巧笑競賡續萬狀晶熒奪人目洛橋羅轡自生塵楚國香纓不藏燭五侯四姓共豪華況乃經過趙李家迷路非關武陵水添妝祇爲壽陽花九門啓鑰光如晝若箇游人不回首春宵病客獨無悰挾冊焚香坐虛牖坐久更闌可奈何著書自古窮愁多鐘磬笙竽盡鄰里誰能載酒來相過

吳侍郎生朝

朝端舊記生賢日使節臨門恩有秩詔書感會形溫辭宴品豐華動私室降崧孕昂誠不誣史簡詩絃互褒述賢人挹道隨汗隆忽向西臺就安逸門弧紀旦還復周瑞霰連天芳歲逾埴音麗曲會中坐蘭叢玉樹來西州稱觴獻壽私庭裏別得人生行樂意貳官禮樂春闈卿托蹟逍遙漆園吏病尹論交情最深因聲附祝成孤吟願將明哲保身智遣我摧頽知止心

玉宸殿竝三枝牡丹歌

中天帝圃蕃英蕤。氤氲嘉祥凝朝曦。竹間芳種易封殖。疊萼三葩同茂枝。慶雲景宿共靈意。鴻英託寓茲爲美。華夷面內始竝柯。慈孝歡心遂聯葩。雲旂羽葆駐天臨。玩此能無悅聖心。幽香自逐德馨遠。麗色更緣眉彩深。因生軼草兼平露。薦祉神庭幸同侶。盛開已被帝琴風。縱落猶成佛天雨。

安福殿千葉雙頭竝枝白牡丹歌

三月春風滿瑤水。珍叢瑞薄紛難紀。嚼若茲花四照中。揚蕤獨茂千齡祉。千齡不應在重葩。雙吐瓊房彰協華。秀跗卽鏤平臺雪。寶豔寧爭台嶺霞。球欄黼幄遙相映。姑射仙姿玉虛境。結根已近堯堯階。借媚非關漢蓮井。天襟多豫玩羣芳。彼美幽姿首效祥。都緣剩沐太和潤。況自頻分私照光。憑休託粹成奇質。一卉時來遂逢吉。願將藥品誌佳名。永續芝房騰茂實。

感花

前日來攀小園樹。枝頭蓓蕾無萬數。今朝置酒來賞花。已有殘英伴飛絮。春花如此將奈何。白日雖遲終不住。鶯歌蝶舞兩矜春。見我長嗟亦飛去。

元憲集卷三

五言律詩

南禪院

王舍多幽剎。林居訪淨人。旁行經葉古。寶色梵天春。風閣鈴如語。烟溪樹勝輪。道場聊抖擻。認得客衣塵。

和楊學士和答中丞晏尚書西園玩菊

僚慄衆芳歇。金英無與儔。香疑飲潭日。歡似漉巾秋。潤蘄霜華入。薰叢野色留。郢蘭休自咤。冰玉此賡酬。

晏乃楊之子壻。

春夕聞鴈

春夕坐神臯。天長北鴈號。來思繁書足。去羨順風毛。瑞鶴天淵暖。啼烏禁樹高。夫君自江海。避弋莫爲勞。

馬上見梅花初發

瞥見江南樹。繁英照苑牆。無雙春外色。第一臘前香。雲葉遙驚目。瓊枝昔斷腸。莫吹羌塢笛。容易損孤芳。

西陂

歲晏西陂好。澄波共夕陽。戲魚來有暈。驚鷺去無行。荇葉疎猶碧。蘭苔老更香。裴回歸鞅晚。併爲似滄浪。

新月

稍傍夕樓明。娟娟底有情。眉纖鬬蛾出。鉤曲誤魚驚。欲暗猶銜岫。將斜更上楹。刀頭君自晚。莫枉桂初生。

過璨師房

病客塵纓外。幽齋法境中。庭喧施鳥食。坐拂去花風。茗溜沈甌綠。檀烟入篆紅。忘言一相對。何處妄求空。

送外門朱秀才見訪都下卻歸安陸舊隱

白髮游梁晚。青山念楚歸。魂銷雖得別。戰勝卻成肥。秀才忘懷進取年高。道勝有康寧之福。障日都門蓋。迎烟礪路衣。試尋南圃樹。今長幾多圍。予昔僑居安陸小園。正在翁宅之南。

次韻和吳侍郎謝王陝州寄酒

遙聞齋酎絜。來佐客觴酣。棠野歌新續。兵廚興舊諳。竹供醅上色。蘭獻液中甘。欲識西臺勝。厭厭夜雪庵。

建隆寺北池亭

寶刹開初地。滄浪繞故城。菱蓮俱野色。鳧鶉各秋聲。岸闊烟無著。牕虛日易明。歸驂誰訝久。正爲濯塵纓。前歲春僕與獻臣同餞常山公于苑西曾未再葺已均師門之痛兼承卽日親奉攢塗追往悼今哽涕無已因成短詩抒感諒心契之同戚也

昔歲西郊餞。曾瞻出守麾。今年東第哭。便嘆哲人萎。辰已空成讖。膏肓不遇醫。詰朝聞袞斂。心折寢門悲。

贈兵部尙書魯肅簡公挽詞三首

應運推邦直。乘時講化源。不冠嘗可奏。問樹本無言。亮節裨初載。清風裕後昆。忽嗟梁木壞。褒冊賁忠魂。

昔事重明邸。俄陶萬物鈞。專懷長孺直。終損武侯神。舟壑先成夜。桃蹊遂不春。惟餘麗牲刻。終古誌名臣。偉望巖巖峻。忠言謬謬昌。門無謝恩客。惟有獻書囊。王駿封侯晚。臧孫樹德長。都門簫鼓發。行路泣云亡。

送黃昱赴太平州理掾

閩錄家聲茂。唐銓吏格平。新資掾三語。舊榜佛千名。月苦鄉魂極。春寒酒意輕。高材難偶俗。慎勿對參卿。送比部馬員外二潮提點刑獄

西漢爲郎選。南方奉使才。書隨星火落。帆拂斗牛開。束筭聞民悅。丹毫絕吏猜。奈於持節重。無客對銜杯。秋日小雨後作

晚陌收殘雨。高軒冒夕霏。風乾移舊響。月破隱空圍。敗葉相將舞。寒雲不肯飛。興潘岳以太尉作秋賦何術寫心微。

送英州理掾朱員

遠補參卿掾。來過乞墅甥。秋悲先鴈引。曉涕伴參橫。意于期獨疾。梅花幸寄聲。片言無異俗。陰德在鄉閭。送從兄祕校咸赴衢州都掾

倦客睢園遠。迎家越絕長。聊甘督罰掾。羞比人贊郎。汙竹書滕密。炊菰宴具香。蘭臺英藻盛。方信乃宗彊。送宗弟祕校壬赴建州理掾

補吏唐資淺。遊方漢牒遙。貪榮親及祿。詎悔俊沈僚。葛詠同根庇。松期晚歲凋。曾孫柔俗美。前識銛箔銷。

相州春日

北土無繁卉。空亭有暝陰。狂飛僧野絮。多舌恨春禽。地燥山如朽。池寒水不深。生平箕潁志。軒冕獨何心。

送太常王素博士許昌通理

連佐陪京郡。愁銜出祖杯。新曹拋野蕘。舊第老公槐。君大父太師常爲先太尉文正公手植三槐于庭以期遠至事具家傳府檄迎車遠。戎

牙宴豆開。遙知傾坐日。方歎阿鄜才。許昌府公太師未識君今寔爲之佐

秋夜禁直聞雨

微道千廬地。宵霖八月天。牀棲吳簟竹。牕濕漢宮錢。幕影翻層浪。簷聲響細泉。空階何所得。併是廢愁眠。

臨春水

盡日臨春水。非關問要津。舟行魚避檝。岸坐草留人。杏萼千紅糝。苔花小翠鱗。已堪遺俗慮。何必擲江濱。擲繁于江見莊子

東方欲曉

鳥渴催宵漏。雞鳴引曙光。山西河闊淡。天北斗低昂。銀燭香猶燼。瑤琴冷未張。何須開寶鑑。容鬢定蒼蒼。

掖門待漏

曉陌千槐落。嚴扉萬蓋留。浮雲低觀闕。殘漏急章溝。斗柄遙臨殿。參旗側映樓。如何軒上鶴。獨憶海天秋。

和吳侍郎題寶應僧房白雞冠花

野卉秀禪庭。瑤華發素英。託根真不染。肖質似先鳴。露葉疑藏羽。烟蕤更作纓。何妨依忍草。休辯好丹名。

秋蝶

百卉芳心罷。空園蝶影微。雖逢已涼節。尙作有情飛。露菊聊堪採。風蘭或可依。履霜從此懼。君意定何歸。

登大明寺塔

寂寞南朝寺。徘徊北顧人。鐘聲含曉籟。塔相湧仙輪。弔古千齡恨。觀空萬法塵。三車何處在。歸鞅欲迷津。

燈夕齋中香火獨坐招希元不至

掩室維摩病。從昏太一祠。誰言鼓吹夕。獨禮天人師。燭燼委寒檠。茗華浮縹瓷。同袍不我顧。宴坐復何思。

送刁繹從事自龍舒西赴青城宰

東別羣舒國。西踰二劍天。才高鄴都檄。政圻武城絃。萑馬征蹄苦。巖雞瑞羽鮮。離愁知遠近。萬里到橋邊。

疾風

天陸箕躔動。林簫萬籟空。扶搖莊海北。悲眩魯門東。貪誠詩人墜。清思賦客雄。何因知勁草。霜陌盡飛蓬。

胡謁建隆寺

郡國高皇廟。天龍釋帝居。兵銷擒布後。臺聳畏軒餘。寶榻成蓮坐。

其寺中有當時御榻

戎輅入貝書。守臣榮就望。屏

息拜前除。

遲明出都謝雪龍門佛祠途中復遇雪

路闊三條陌。雲低九鼎門。饒風催騎響。裘霰減貂溫。谷曉天花亂。林空苑絮繁。周甿農意切。一一願流根。

晚歸馳道遇雨馬上作

朝雨雜輕霾。濃陰暮未開。天低五里霧。日晦九成臺。宮溜輕淙玉。坊車小隱雷。不愁馳道遠。寶色夾千槐。

河陽寒食

關輔陪京外。年華禁火中。柳矜河上綠。花獻酒邊紅。野市鞦韆月。春樓鬢築風。三州六鑽燧。安得不衰翁。

晚晴

斜日紅初斂。晴山翠欲流。休歌陌婦怨。寧作賈胡留。物意如相樂。吾生有底愁。早分好風月。更上庾公樓。

贈中書令沂國王文正公挽詞二首

揆路同寅業。師垣出守麾。終無三令喜。便集兩楹悲。衰職嗟何補。天心感慙遺。幽泉空漏漆。非復作霖時。

自昔榮歸袞。今茲駭閼川。天愁摧柱日。星痛殞箕年。素履遺儒範。忠謀溢吏篇。空餘涓鄉陌。長似峴碑前。

錢侯東齋

北里開公第。東齋集俊游。祕書家有副。甲令世傳侯。鳳竹供聯冊。鯖盤入宴羞。門前多鶴蓋。不爲騁長楸。

贈駙馬都尉李和文公挽詞二首

曲里猶龍族。西京尙主侯。勳華傳舊鉞。名理寄虛舟。得疾真無妄。觀生遂若休。偏嗟荀令沼。回作逝川流。

北第琴樽歇。東原旌旆飛。清風邈無所。此路是長違。野闊車吞響。天愁日抱輝。空餘門下客。魚鳥歎何依。

獨坐郡圃北齋

宿雨催秋物。清風卷歲華。殘蛩初去柳。寒蝶尙尋花。密篠留蒼霧。紅梨染落霞。城頭八九子。日昃亂啼鴉。

贈太子太保晁文公挽詞二首

帝禁留辭範。儒林老棟材。方期割牲禮。遽近奠楹灾。歲晏巢鷺逝。天秋弔鶴來。宗工銘盛德。千古照泉臺。几杖辭榮久。龍蛇感歲遷。留春太史記。成佛謝公緣。素蓋寒雲外。哀簫落月前。無煩樵牧禁。行路拜新阡。

贈司徒兼侍中宋宣獻挽詞四首

（案）宣獻宋綬謚。庠與綬同姓。不宗。見于景文筆記。故稱不去姓。

一世文爲伯。三階象有光。何言隆棟吉。忽歎夜舟藏。櫟禮朝頒冊。哀音路過喪。善人今不與。神理太茫茫。梁木萎邦哲。乘輿哭第家。斂恩周袞里。追品漢貂華。素禮初無悔。浮生遂有涯。斯文從此喪。誰與辨咬哇。舛運明生疾。忠懷語絕偷。空榮人曳履。終隔相封侯。太史藏書法。門生助紼謳。惟餘文獻謚。不復嘆平頭。宗工天下寶。歸葬國西原。野闊簫聲苦。雲愁旆影昏。如存三事禮。不返九京魂。河海空成淚。難酬國士恩。

別墅冬霽

宅隱羊曇墅。門連仲蔚蒿。銜盃思左蟹。舒嘯憶東臯。楚桂風生穴。莊魚浪溢濠。平生丘壑志。終願寄民曹。

冬霽

夜枕鴻遼漢。霜天雀噪園。回車長者轍。曝背野人暄。墨溜沈寒沼。松醪湛凍樽。誰能穿雪履。待詔魯班門。

贈太傅中書令張文節公挽詞三首

素範流邦冊。昌言溢帝聰。三台應天老。萬事問胡公。道有如絃直。生嗟委蛻窮。令君兼上傅。袞斂賁遺忠。昔命光三事。今嗟贖百身。堂無織蒲妾。車有吐茵人。台圯層氛夜。槐凋故府春。空餘相國第。不與勢家鄰。平日開黃閣。茲辰奠素旗。留侯嘗辟穀。巖說遂騎箕。天迴哀笳咽。林長導娶遲。行人此墮淚。何必覘亭碑。

次韻和吳侍郎再葺東亭兼懷晁公舊隱

地占心齋舊。天扶藥喜身。高懷聊避寵。幽境更隨人。樹密添新籟。叢香續故春。婆娑榮路友。偏倚此相親。

夏夕雨霽

積晦連空卷。繁蒸此夜收。峯催雲去夏。珪伴月迎秋。樹老殘煙入。庭虛爽氣留。長康惟半黠。孤詠費冥搜。

北亭

舊壁橫空苑。危亭納夕霏。野蟲多各韻。倦鳥忽同歸。木落驚秋晏。人愁念昨非。生平嵩穎志。尙或拂塵衣。

早春北亭見城隅荒寂

荒城樓堞少。野色徧高低。蔓草無名綠。幽禽取意啼。天形岡樹北。日腳嶺雲西。不覺凝笳動。春風引夕蟬。

寓居寰內宰邑者數見存訪因成謝

謝病非三最。爲氓乏一廬。何言羅爵尉。時駐鳥鳬仙。華轍交深巷。餘香襲故氈。猪肝難設具。應作閔生憐。

得充國書報都中葺所居初成輒以自慰作一首寄于京

昔貴三公第。今營一畝居。聊堪避燥濕。兼欲貯琴書。獸窟猶思騁。鵲巢不願餘。長安窮僻地。吾亦愛吾廬。

送晏延平宰邑分寧兼過鄉墅

銅紐腰新綬。烏衣省故廬。鄉無夜行諺。極有世藏書。楚潦蘭浮楫。潘園板御輿。蚩蚩吳俗美。庖刃一投虛。

送靜海高簿

城闕曙烏啼。行人歎解攜。舊歡苹鹿散。新意棘鸞棲。淮月涵孤蚌。江雲雜斷霓。漉沙應構賦。春渚正平隄。

魏花千葉

露晚移珍樹。丹房一紺幃。綃輕無奈疊。霞碎卻相依。倏日香難斂。擎風力自微。他時零落恨。千片爲誰飛。

晏歲

晏歲無情晚。陰飈昨夜聞。芳條臨檻勁。短日轉樓曛。苔石收蒼暈。冰溪疊素紋。蒿蘭雖異種。霜至若爲分。

早春雪後見辛夷初發

冒靄初分葉。驚春已作花。鮮于紫艾綬。殷過赤城霞。花色淺于茜破蓓香囊小。銜趺彩筆斜。俗號木筆皆其形似騷人雖麗思。忍作桂旗車。楚詞有辛夷車結桂旗之語

秋夕池上

月御橫霄陸。溪樓敞夕霏。神龜荷裏宿。仙驥露中飛。屏筵風捲暑。攀條客念歸。治城空極望。憂樂意多違。

和友人晚出池上

節物更徂候。幽衿屬釣臺。蘭苕兼佩長。桂葉學旗開。鵲避驚弦去。魚隨晚餌來。謝塘多藻思。弭蓋一相陪。

次韻和王密學冬暮書事

歲晏陪京守。心閒俗自安。斗城供近望。天幕借餘歡。秀句然其待。幽經濯手看。不因郵問數。誰識政條寬。

小橋

野水危梁渡。凌虛一徑橫。鄭車求代涉。漢櫂且專行。濠詠觀魚樂。圯書跪履情。斜陽葭菼岸。鷗鳥爲誰驚。

姚黃

世外無雙種。人間絕品黃。已能金作粉。更自麝供香。脈脈翻霓袖。差差剪鵝裳。靈華餘幾許。遙遺菊叢芳。

歲晚餞客南亭二首

偶作津亭餞。還驚歲物非。蒼葭無際合。黃葉有聲飛。別恨隨人遠。鄉心著酒微。猶欣見山色。紆轡暫忘歸。

亭上遙見江南山色

淮壤窮南界。亭臯坐渺然。平窺京口樹。斜落海門天。重霧多藏日。寒潮不送船。江岸堰高。行船必以潮爲迎。送冬月水漸小。俗曰寒潮。

江山寧有助。私作楚騷憐。

遙夜

夜夕更籌永。霜飛歲籥空。斗杓常記候。蟾暈豫知風。過鴈驚流弋。衰螢戀故叢。可堪鄉思發。夢繞兔園東。

竹雞

羽族何微眇。交交作好音。遠聞真似語。寂聽本無心。倦舌沈荒塢。嬉羣聒翠林。鷓鴣王佐筆。從此異凡禽。

元憲集卷四

五言律詩

鬪雞

對壘瑤瑤地。雙鷺滅玉塵。長鳴非後郭。利嘴欲專秦。鷗領聊延敵。鷹揚願殺身。君恩定多少。引距卽隨人。

春渚

溪上照瀟淪。吾纓此濯塵。風清琴籟細。波浸沼毛春。處裔蛟何待。鳴雛鷺自馴。直鉤聊適興。底處餌文鱗。

晚霽

斷續簷聲歇。徘徊隙影賒。歸雲衝樹破。殘雨入樓斜。徑綠都成草。叢薰尙隱花。便同江海思。春水照軍牙。

負暄

旭日東南霽。霜天病骨寒。心同陽藿展。志鄙夏畦難。東洛貂裘壞。西華葛被單。嵇慵聊自樂。愛景始三竿。

惠泉

濟物功偏厚。朝宗勢不迷。一航容宋葦。六斗異涇泥。潤溢呼魚輟。光分抱甕畦。寧同南國詠。酌飲變夷齊。

有釋子以禪會圖貺余者此圖卽今駙馬都尉李公所製繪故楊大年劉子儀及都尉環禪師等信一時之盛集瞻歎不足因成紀詠

法集超初地。工毫構妙緣。星占世外聚。月寫相中圓。指指誰標識。心心自默傳。惟應阿堵處。俱是到忘筌。

對月

蕭寂東軒坐。徘徊月馭來。風休涼暈缺。旬破晚弦開。紫漢沈星樹。仙莖遍露杯。誰憐故林鵲。終夕自驚猜。

得告上冢

拜墓標唐令。褒親漏漢恩。永懷淒欲寄。忠訓藹如存。宰樹錦城陌。農疇潁曲村。異時裁敍傳。容或記臯門。

立秋後一日涼風蕭瑟便若感人

倏忽徂炎罷。驚秋自此辰。殘蠅空愛露。孤扇欲辭人。嵩少千尋嶺。滄浪萬里津。如何一乘輿。烟策弄颺輪。

河陽秋思六首

潘岳有秋興賦謝惠連有秋懷詩今作秋思連

關外山河闊。城邊卉木腓。露濃蟬始罷。風急燕猶飛。不雨雲中薄。澄沙水自微。善哉吾祖歎。能此送將歸。

自古悲秋物。多傷黯黯魂。鱸魚輕客宦。紈扇感君恩。潁瀨寒明野。嵩雲側露村。此中知止地。歸去掩柴門。

芳序雖云晚。華顛亦已新。蛩鳴偏傍耳。燕去不辭人。山隱棲巖路。朝嬰佩玉身。故溪應更好。前夜夢垂綸。

出處因年警。多慙與願違。於陵終不仕。疏傅幾時歸。江柳寒陰瘦。畦菘晚葉肥。寄聲溪上鳥。且莫背人飛。

久雨收寒潦。層颺蕩薄埃。鳴蛙鼓吹歇。高鴈弟兄來。食肉嗟謀短。關弓任世猜。故園三徑在。新菊幾叢開。

秋物自能晚。秋聲何足悲。歡應隨壯去。病已與衰期。斗遠終難挹。天高不易欺。此心丘壑戀。匪石恐難移。

雨霽

小圃雨霽

曉雨纔收潤。高軒一爽神。雪峯將變夏。桃蠹漸辭春。霽隙微陽淡。陰牆積蘚勻。空餘稚圭宅。蛙響徧諸隣。
風雨殘秋罷。年芳遂悄然。黃花沉暮蝶。蒼柳嘯孤蟬。霽日高彌淡。曛霞冷不鮮。忽聞雙鶴唳。心斷故谿田。
家養雙鶴。乘秋多唳。

霽後

小雨春膏潤。微波晚照壺。空光遙送電。梁影半傾虹。珍樹疎煙合。坳塘暗溜通。羲皇誰可上。靖節有牕風。
凌景陽寺丞與韓綜監簿蔡襄秀才雪夕會飲聯詩數十韻以相示因或詩句

歲籥愁雲暮。朋簪夕宴開。賢如潁州聚。興是剡溪來。瀉洒蟾波溜。雕章燭刻催。三英知絕擬。況復是平臺。
漢濱北樓

一水東流闊。諸峯右轉深。蟾規欲破暈。天杵不盈尋。浦逗分風席。洲喧避繳禽。憑高機事息。併爲漢川陰。
晨謁宮門小雨初過

宮漏籤聲急。天街雨腳微。曉寒凌禁樹。春氣裊朝衣。瑞霧輕猶濕。香塵重不飛。雞人傳鑰出。華旭滿彤闈。
淮上

晚歲清淮路。淹留數問津。風平天合水。舟進樹迎人。餓鰲貪魚沒。高鴻望渚遵。楚鄉梅柳意。相慰似先春。
北樓三首

地迥樓堪倚。天長日更勞。何須雲渺渺。況自葉騷騷。脫免橫岡遠。冥鴻避弋高。四愁休徧詠。俱是一霑袍。孤堞神垌畔。平原歲琯陰。驚鷹時易數。倦鳥卽投林。日舍翻車恨。天旄伏櫪心。蓬池八十首。半足爲登臨。危檻倚孤城。風襟俗慮醒。天高鴻類乳。雲散日如萍。疊巘斜銜岫。回川曲抱汀。騷愁千古地。椒醕弔遺靈。送兩浙轉運道卿學士二首

彼美閨臺彥。胡爲江海行。眞貪子舍養。不厭使軺輕。茂草姑蘇苑。蒼山越絕城。莫因羊酪味。終擬笑諸脰。新歲郵中問。殘冬湖外書。歡同烹鯉日。情是斷金餘。澤節行臺峻。天垣右席虛。不應周吏課。朝紱企歸歟。晚登東樓懷子京鎮陽二首

洛表樓堪倚。燕陲望不窮。秋聲南送鴈。寒意北隨風。斂暝關雲黑。銜規苑日紅。凋年霜霰惡。慎勿損荆叢。周界西窮陝。常山北盡邊。關河相望日。容鬢各衰年。蓬亂將風野。禽稀欲雪天。治戎如有暇。莫惜賦歸田。秋圃感物

秋葉霜前綠。秋池雨後清。殘蟬多默默。寒蝶強輕輕。丹果林梢熟。黃花草際明。心慙逃相客。世外掩柴荆。羣玉殿十二月二十三日錫宴

歲晏彤帷敞。天深紫宇寬。氣和先合樂。仗密不知寒。斟酌中衢飲。伊亞平聲別殿歡。先春皇意悅。花滿從臣冠。

賈翰渾文罷。瑤觴續宴初。帝韶重舞鳳。玉藻更歌魚。景駐三休閣。歡留六尺輿。賜金將厚意。併入史臣書。

杜門

古宇切郊寰。荆扉度歲關。賓綦秋薜合。童唱暮薪還。石上春梁苦。壇東避世難。屢屢猶可爨。誰訪陋居顏。
謀退四首

勤勤念耦耕。不是釣虛名。皓魄圓猶缺。芳卮滿故傾。佩韋防事急。分肉倚心平。此意將誰語。臨深坐治成。
常聞疏少傅。知足遽辭官。祖道賓儀盛。揮金里宴歡。畏途非螻屈。高志自鵬搏。行路賢哉歎。吾心良所安。
昔日於陵子。遺榮自灌園。三分輕國爵。一世謝人諠。野笠鋤春隴。橫棹汲曉源。區區冒榮者。天壤亦何言。
濟世才無取。登朝運所遭。濡鵜真竊祿。汗馬本非勞。漢重商賢隱。堯嗟穎客高。古今閒自況。何翅九牛毛。
秋日漫興

天淡雲摧險。風清水始波。暗蟲催紡緯。驚鵲報填河。時七夕宮扇執規掩。仙盤露彩多。空餘歸客恨。芝朮老巖阿。

晚庭

蒼靄秋霖歇。高軒夕景遲。桐凋金井恨。蘭老玉琴悲。巢燕寒初失。風蟬晚屢移。黃昏禽語鬧。相喚宿何枝。
送王秀才下第隨侍東去

春色鄉粉老。波聲客櫓催。林鳥貪夕哺。都鷁怨風摧。處晦囊中穎。加餐案上杯。重來期歲晏。飛藻石鄒枚。
送明州章從事

東國有嘉招。歸心越絕遙。幾程淮蚌月。一信海鰲潮。蓮渚熏談席。霞天認賦標。時平軍版息。麗藻入雲謠。

郡圃洗心亭宴坐對春物因書所見

盡畫山楹坐。居然外物身。野葵能向日。怖鴿解投人。萬萼融朱蠟。平蕪識紺茵。須知無事處。堪養不才臣。

宿齋太一宮寄天休

入暮鳧鐘警。乘涼鵠帳褰。霧來燈欲濕。螢過草疑燃。野氣樽浮桂。幽香席藉荃。無因招傲吏。同宿一壺天。

殘春夜雨

春色無情老。宵雲有恨低。輕寒借鴻駛。早暝入烏啼。晦燭風生幔。漂花溜漲溪。滴階兼被草。聊此況淒迷。

寒野

芳歲行逾盡。高堂興耿然。林號欲風野。雲綻已霜天。鳥彩疑留日。鴻聲似惡弦。幽衿忽忘返。更爲月娟娟。

正月三日作

迎春纔十日。

是年立春在故歲
季冬二十三日

應月已三莫。池面開新素。山光復舊青。灰飛空玉琯。醅動漲金瓶。剡作尋

芳具。常筵忌獨醒。

奉送滁州趙學士

灼灼書林彥。胡爲江海濱。希遷杜陵客。出守始平人。夕夢螭階遠。

君早嘗記
注之選

前驅隼旆新。離觴君莫愬。去

去易沾巾。

代書寄奉寧樞密直諫議學士

故秋嘗假道。倏忽改芳年。三疊黃河上。千花白髮邊。冰消牛口渡。山綠虎牢天。東望無人會。滎陽太守賢。憂閔詣臺先。寄獻臣天休。二學士。

去國三年恨。還臺九死餘。淒涼曾釜粟。感咽晏楹書。鮒勺懷窮轍。鷄棲整故車。惟常親益友。彼闕費漣如。春野五首

衡華負城開。春兼野色來。煙扶霽日柳。雪惱故年梅。波影魚先動。林聲鳥並催。欣欣羣意悅。病骨獨遑回。陂色入柴關。陽和遠近還。平蕪隨蹇步。新水照衰顏。廢堞鳥聲樂。晴臯雉羽斑。一逢樵客語。無埃辦連環。近出東郊道。時巾下澤車。田溝蛙拖紫。沙徑鳥留書。木引藤絲遠。牆蒸菌蒂虛。幽懷聊俯仰。無意事施隨。沃野周原接。遙陂鄭洧連。鬱葱中縣氣。南北富人阡。鳥騁因風野。虹生欲霽天。斜陽墟落外。咩豕食春田。夕藹收芳甸。春高徧宿茝。朝虹先雨出。寒鴈後陽來。遠木芊芊茂。幽花脉脉開。欣逢老農語。爭席坐林隈。林下

偶作中林適。聊觀萬花春。蜂巢喧似市。禽舌巧于人。陂溜鳴田尾。藤梢衣樹身。鄉農時晤語。野意合天真。郡圃海棠初開。追憶學士院玉堂後西軒。此花最盛。置酒有感。

昔作瀛州賞。今逢汶水春。可憐無並色。來對始衰人。溫樹遙知漢。仙桃尙記秦。臨樽如舊識。爭忍判芳辰。寄題奉寧樞密直諫議新葺漱玉齋

聞說西齋水。潺湲逼畫楹。雖添新寶響。不改故源清。花落波浮亂。杯遲屈曲行。無因陪夜宿。同賞瀑巖聲。

次鞏縣

昔走成周道。春風尙落花。

頃歲春末赴洛陽

今馳河內傳。秋日正臨霞。山色依前綠。顛毛只是華。見迎多故吏。衰

壯兩驚嗟。洛陽故吏皆迎余于道

病臂痛踰月不能御刀筆

百疾乘衰運。雙肱怯痺搖。身知九折痛。肉訝半分銷。掉市將誰羨。拘原莫我邀。惟堪楚林下。如槁學承蜩。

傷死馬

辨道曾資智。嘶風忽絕音。故蹄休踐雪。朽骨詎酬金。附尾讒蠅散。投鞍嚙鼠侵。棄帷宜一報。盡力有前箴。

涉淮泝清迫于冰涸舟次下邳先寄彭門趙侍御二首

病骨憂南土。孤懷念北遷。欣承紫泥詔。且向汶陽田。夜雪淮冰合。朝暎海氣鮮。風波雖繚繞。自有故交憐。

此地淮壖極。連壖北轉初。風煙寒背楚。陂澤遠通徐。葆髮驚秋外。葵心戀闕餘。不憂芳歲晚。松柏自扶疎。

次韻和北京太師丞相潞國公創作茅齋

地僻誅茅後。堂幽構廈餘。誰知冶城望。更作傅巖居。淨供香廚飯。真籤藥笈書。因公高世想。轉憶舊田廬。

廢書

斷簡孔堂壞。遺經汲塚虛。謾求芸辟蠹。先歎魯成魚。舊帛愁連蓋。亡篇恨蠟車。吾家先訓在。檀鑿晏生廬。

初春置酒河上得前忠武記室饒廷評書因成感詠以寄

故歡清溪上。今醉濁河邊。素領添新髮。春風似去年。暖雲邨北樹。芳草鞏陰田。感舊情何極。重看記室牋。得天經書問

久臥堪憂巷。驚聞不滅書。高風五柳外。深意八行餘。努力邀加飯。相逢約下車。殷勤長跪讀。雙睫費連如。禁中寒蟬

何處幽林蛻。來依禁樹鳴。風綏非冒寵。露腹祇知清。曉韻飄觚闕。殘嘶逗綵甍。秋蟬多怒臂。寂寞好全生。楚辭云寒蟬寂寞而無聲

感秋二首

夕軒疎雨罷。物物爲秋驚。病葉先風落。寒蟬趁候鳴。西飛愁燕急。左界恨河傾。借問三江客。鱸魚底有情。歲事催人事。榮心伴客心。鸞驂收畫扇。螳臂感瑤琴。夕露繁將滴。朝雲薄亦陰。金貂寓直省。潘興轉難任。

元憲集卷五

五言律詩

甲戌冬屬疾賜告二首

行年三十九。病腦劇中乾。目界空花眩。脾倉宿滓寒。未燈欹夕枕。欲食進朝丸。惟有披書樂。依稀及士安。
恩告假衡華。年華飛琯灰。右眠安佛脅。深息養仙胎。數犯稽違禁。誰憐漚落材。使軺均病粟。臥病適值長至官給館物更自飄然哈。

小疾

舊疹感春陽。岑岑體正尪。雙瞶便貉睡。一息寄龜腸。味減轆羹釜。心疑照弩觴。藥苗行可采。更驗太清方。
晚望京邑

暮壘初休角。孤譙半掩門。鴻聲騁寥泬。鵲意戀黃昏。遠岫排頭碧。春河徹底渾。關東三百里。依約是天閭。
候月臺

平昔詞林伯。嘗爲右輔來。庾公偏愛月。薛縣未傾臺。錢石雲根斷。臨波水腹開。良宵時弭蓋。方信謝莊才。
過列子觀

兩作朱轡守。赴洛孟二守皆經此祠重登羽客宮。故噓牆舍壞。塵案耐杯空。款戶殊無屨。乘衣尙有風。軒游曾駐蹕。

高意掩崆峒。真廟西巡狩親謁祠下有詔褒加冲虛至德真人之號刻石存焉。

北臺

遠日春風外。韶光晚思前。短青平野樹。斜碧半樓天。芝朮參雲嶺。桑麻冒蕨田。詩成無所況。題作詠懷篇。
城堞俯漳湍。關河遠近看。曉山天外紫。秋日霧中寒。短髮卻成葆。孤心轉似丹。蕭家窮僻地。歸去養衰殘。

善惠師禪齋

象馬王城地。禪局此獨開。漏聲隨葉換。風意繞幡來。馴鴿依齋樹。飛花戀講臺。朝珂時一集。併爲碧雲才。

臨秋三首

兀坐臨秋水。悠然到夕霏。蓮叢經雨折。菰米待霜肥。有餌潛鱗出。無軒野鶴飛。騶呼且勿遽。更待月華歸。
素潦沙成岸。蒼條柳映津。蟬休疑惜已。漢杜密曰。隱情惜已自同寒蟬。蜻去似猜人。事具淮南子。紺幕隨天遠。瓊鉤伴月新。清風時一至。吹盡故纓塵。

次韻和西堂風靈

脫葉金霜罷。滄洲滿目前。林風寒結籟。溪日晚留煙。獨木橫宮杓。方苞入稻田。持麾更吏隱。殊覺主恩偏。
霧氣疑成雨。終風亟挫春。祗驚天灑礫。寧是暮吹塵。大旆亡空澤。奔車債要津。高樓非可望。偏汗扇中人。

謁龍門無畏師塔祈雨作

梵聖遺靈骨。洪緣福故都。慈深雲不斷。法徧雨常俱。使節開眞栴。朝廷近遣中貴人開栴祈雨。天香奉供爐。又賜御封。

餐
拳拳依帝力。餘潤冀昭蘇。

過普明禪院二首

唐太子少傅
白公舊宅

自昔仁爲里。于今福作田。清風殘竹地。寶色故池天。繪象成真侶。

樂天舊影與
蒲禪師偶立

家聲入梵緣。

又常自稱一
香山居士

披龍藏集。無復歎亡篇。

後唐明宗子秦王尹京曰特寫公
文集一本置經中至今集本最善

軒冕唐年客。溪林洛社坊。雖開居士室。未壞魯恭堂。佛樹高彌綠。天花落更香。惟餘名不滅。來伴法燈長。

浮橋

東潭雙津隘。浮梁古制存。灘移淤岸勢。標蹙漲波痕。逆浪船排首。周阿纜植根。祀勞如舉典。元凱有英魂。

讀書多所廢忘

舊學紛無幾。幽懷斷復尋。蒼茫萬機論。零落九州箴。枉嗜韋編讀。猶依槁簡吟。時無袁伯業。孤陋任年侵。

晨興讀書

老病何爲者。陵晨縹帙開。終無經世略。似有著書才。

余家子京受詔作唐書百
餘篇余亦斐然有著述意

史記金藏匱春秋玉作杯

吾心聊自適。萬事已焉哉。

守洛

久玷疇咨地。新蒙策免恩。往非堪昨舌。來寵夢驚魂。

余罷相蒙恩改官加
職非待罪之本望

病與疑弓釋。身隨散櫟存。惟餘

太陽照。終不礙孤盆。

至洛踰月凡兩蒙
遣使傳宣復問

次韻和吳侍郎睡足成詠

何處西臺樂。高眠萬慮沈。盃盤春席罷。風雨畫堂深。氣勝龜調息。魂交蝶伴心。有人驚曉漏。顛倒整衣簪。晚歲感舊寄永興相國晏公

誤知三十載。頑魯寄洪鈞。物比青氈舊。年驚白髮新。河冰斜界陝。關樹曲遮秦。何日陪師席。孤懷跪白陳。聞安道舍爲鄰火所焚

里旅聞遺燎。連薨委夕煨。初無徙薪智。枉被及魚災。勺水寧堪救。三車諒未摧。天知君自足。聊復寄靈臺。南軒望雨

層靄冒遙城。風長雨足輕。暗雲依電簇。微日記虹明。樹洗連帷出。荷翻百琲傾。幸無漂麥慮。舒嘯倚前楹。夕雨

春溜簷聲細。層波幕影斜。雷車陳后館。雲枕楚王家。桂凝霞杯蟻。蓮空蜜炬花。莫漂枝上蝶。幽夢在天涯。雨歇

急澍乘雲度。涼煙落晚留。山顏紅露日。田尾濁鳴溝。知倦翩翩鳥。來思濕濕牛。東菑聊騁望。偏識種瓜疇。池上觀雨

急雨橫塘晚。蕭蕭逼坐隅。斜津添竹淚。繁點溢荷珠。泥重聊休燕。波翻尙浴鳧。風霆河外惡。橋卒弗傳呼。送太常魚博士通守漢州

春霰霽征塗。離人向蜀初。還拋博士薏。食佐使君旗。藻思夸名閣。忠懷慕叱車。布刀多計吏。行矣數通書。

冬行西圃溪上

故柳樊官圃。新禾上野場。郡有稻畦築塢以穫晚煙林外紫。昏日水中光。菊晚香猶在。橙寒味不長。蕭然成隱趣。況復近山陽。竹林近在河內

四月十五日晚出溪上畱連不能去

偶來尋晚景。便覺滌襟煩。岸柳相挽綠。風荷各自翻。歸雲何處宿。驚鷺或時喧。不奈滄波闊。鳩山有故源。山海經河南發鳩山溪水出焉卽此波之源也

譏俗

白雪賡歌苦。華顛答難頻。寒驚穿履客。餓恥祭墦人。泔泔金終賤。胡盧瑱未真。原生寧是病。結駟往相親。送譚祕校赴江陵理曹掾先過衡陽別墅

吾穀飛名早。卿軍補掾新。還家鴈峯地。趨府鶴袍人。樹色圍荆壘。江聲瀉蜀津。無輕束矢訟。陰德及斯民。

貧病

貧病兩何緣。相將百慮煎。儲空擔石粟。書貸倍稱錢。客訝甘蟠李。偷驚昔故氈。因聲謝才鬼。擬作送窮船。

秋湖上晚景四首

小小江山國。輕輕縞紵衣。波光清作面。天勢碧成圍。岸蝶隨人舞。沙鷗掠坐飛。此心兼此境。安得不忘機。

曲檻堪何倚。幽芳幾獨尋。頽雲山露頂。孤月水呈心。翹鸞多依淺。驚魚更就深。歸懷無晤語。身世兩浮沈。
春溜來無限。新蒲綠未齊。蒼煙山帶北。紅浪日平西。野鷺時孤往。林鸚忽並啼。一篇行一曲。依約似青溪。
浦溼春初滿。風煙晚不銷。泛杯橫截竇。作小堰載水爲流杯通舫小開橋。新作釣橋以通舟蓮葉抽萍面。藤梢落樹腰。此中無駭浪。容易打雙橈。

北樓晚景

脩曲少城偏。臨秋坐眇然。殘陽鷗翅外。新月鳥行邊。隱軫齋侵地。蒼茫魯狩田。登高何必賦。歸意自悄悄。

寄李端明獻臣

學道年嗟晚。知非骨已驚。世紛誇要路。天意罪浮名。汶上朱轡寵。淮南白髮生。惟餘方寸地。留貯歲寒情。
次韻和吳侍郎寄致政張郎中以令子倅府迎侍河陽

序齒顛毛貴。傳家子綬青。蘭芳應作膳。椿老別添齡。逸豫鴻排陸。歡心鯉過庭。幾時陪雅集。醉弁一俄星。
奉和御製龍圖等閣觀三聖御書

羣玉中天府。珍圖綠錯文。叢楹開禹穴。寶畫爛堯雲。萬牒眞行辨。千題甲乙分。聖心尊世烈。披玩不知勤。
曉入詔門趨殿中馬上作

鑰出馳宮路。更餘送曉籌。露盤先得日。溫樹未知秋。煙幕昏朱裏。風旂颺綵旒。鳴鞘歷宣室。應爲闕神休。
是日有司大饗明堂禮畢移御便殿

豹隱堂

昔日蒸青地。今茲坐嘯居。人瞻分虎出。庭記墮鱣餘。蕭墨齋猶寶。莊環室舊虛。嘉名傳郡志。寧減武侯廬。

題李洗馬歸歎堂

君有誅茅地。重歸一畝宮。身同巖桂老。心似草堂空。昔歎魚隨餌。今歡鶴出籠。吾廬嵩潁畔。亦欲狎樵翁。

春晦寓月

春序倏云晚。高臺芳意多。花成風地纈。鳥作暝林歌。樹氣薰繁幄。池紋疊細波。夾城歸騎散。煙絮徧銅駝。

池鰲

野水初盈沼。舒鳧亦伴游。雙膺時沒藻。斜陣或迎舟。敢厭吞腥累。真忘續脰憂。杜家鄰舍遠。刷羽恣淹留。

赴洛經鄭馬上偶成

去國雖傷別。乘輶尙及春。榮風清翼蓋。鞏樹綠迎人。後隊金鑾響。前驅隼旆新。衰懷無麗賦。何以詫西賓。

晨興春冷

玉骨臨風怯。華鈿恨帶寬。凍醪催卯醉。小雪造春寒。錦瑟弦聲潤。山鑪蕙炷乾。良辰他口意。慎勿怨花殘。

時賢多以不才誚我因自詠

我本無心士。終非濟世才。虛舟人莫怒。疑虎石曾開。蚊負愁山重。葵傾喜日來。欲將嘲強解。真意轉悠哉。

題廣愛寺楞伽山亭

世傳唐初有異僧。呪土爲此山。形制奇詭。且云鳥雀不敢棲宿其上。今遠猶然。

誰覆爲山簣。工作架海形。神輓陰助險。佛髻巧分青。棟老棲煙濕。禽翻避呪靈。會須依定觀。一一訪巖扃。

和中丞晏尙書西園晚秋懷寄

節物名園晚。風煙亦媚秋。鈿稍低露竹。珠罽老霜榴。塢籟晴先響。牕霞暝自收。山楹誰侍坐。正似傅巖幽。
衆籟日蕭蕭。閒園氣寂寥。風萍難覆水。霜葉易辭條。噪鵲繁聲合。寒蟬舊吹飄。試尋籬下菊。鄰酒濁盈瓢。

城外秋晚

澤莽鬱蕭條。憑高不自聊。水寒陂鴈集。城廢冢狐妖。野色空秋穫。林聲急暮樵。先疇東北路。鄉思託回飈。
過行慶關

洛鄭東西接。河山表裏雄。嶺回千樹出。天轉兩崖通。虎圈周原綠。敖倉漢粟紅。今無楊僕恥。四海是關中。
再經行慶

行李纔險鄭。關門已及周。山支抱鞏合。洛尾貫河流。驛騎迎朱轂。封人訝白頭。余頃守洛未有白髮今則衰矣迎者憫焉往來
何太數。慙恨見嵩丘。

添色紅

景淑能藏媚。情多不頓開。初疑香色老。終伴綵煙來。夕露濡仙纈。晴陽染醉腮。施朱應有意。併爲楚人材。
郡圃觀稻

誰取霜禾種。來依郡圃栽。芒隨虎掌熟。畦作佛袍開。自應蟬鳴候。應無蟹嚼災。河洛無蟹公庖豐飢飯。知免拾

顏棣

歲晏城上北眺

萬彙競搖落。臨高傷旅魂。驚飈無定響。寒日有餘昏。路轉平臺苑。天低覆盎門。惓惓心未已。曷月報君恩。

和中丞晏尙書西園石榴紅葉可愛

幾歲江南樹。高秋洛涘園。碧姿先雨潤。紅意後霜繁。影疊光風動。梢迷夕照翻。一陪幽興賞。容易到黃昏。

鵲鵲

曲浦江湖漾。文禽伊洛飛。愛尋芳蓼去。更伴晚霞歸。露溥金翹潤。菰香錦臆肥。主人眞賞厚。慎勿去郊扉。

老屋

老屋共棲遲。窮年弔影悲。宵牀牛誤鬪。晝壁鼠無儀。牕北那成隱。家東益自嗤。因聲謝巢燕。京洛足華榱。

曉謁城東嶽祠回馬上作

州經至和三年水災城池荒圯蕭然殊可歎憫

洛水成災後。霜原落木秋。濁河雖自復。寒潦不知收。路壞停軺館。城摧卻敵樓。民廬無黍稷。何術望神休。

小隱春日

小隱非吾土。幽懷屬暮春。人憂原憲病。鬼笑子龍貧。草合看迷路。簞抽欲過鄰。俗嘲慵自解。驥弩惜千鈞。

齋中焚香宴坐

耳界千聲外。爐薰一室中。妙心那有住。眞意本無空。香飯凝盂白。天花蔽席紅。閒觀色身相。方信幻人工。

送蘇寺丞宰廣德

早捧諸侯檄。新登九列丞。庇身聊製錦。受命更懷冰。浦葯薰行櫂。江禾壓翠塍。高樓如可望。西北一長凭。

和吳侍郎微雨中與一二親友同登香山石樓

伊瀨鳴秋麓。香樓隔雨溪。天形林罅出。山脊霧中迷。岸峻靈龕密。沙平野路低。只應觀佛土。物物便堪齊。

歲宴感懷寄吳侍郎

百慮靜相尋。蕭蕭芳歲陰。感君辭劇日。休我冒榮心。歷塊疲東道。才者有時而倦巢枝憶故林。拙者志在霜毛秋更

短。持底受華簪。

同年胤汝弼赴宰臨賀見過敍別因成感詠

朋好日寥落。征驂那忍聞。先成數日惡。更負十年薰。客棹秋瀟水。官郵暮嶺雲。圖南尚良食。少作弔湘文。

齋居有感

氣逐薰絃動。春隨畢雨殘。蠹桃欹廢井。新李礙游冠。處晦垂轅轅。干時上坂丸。無人憐仲叔。平日憶猪肝。

立春

底處春來早。依依傍日華。年光隨寶勝。陽律犯鳴笳。冰沼應潛坼。風枝已自斜。江南無驛騎。何計賞梅花。

李公佐歸漢東予之妹壻

門有聯瓜懿。人傷摻袂分。新篇稽奏牘。故社戀鄉枌。桂魄離懷苦。蘭荇夕膳薰。芳音毋自寶。西北足歸雲。

送王祕校嶺南都講學

高才嘗負俗。公薦此開榮。卻領淹中學。還爲稷下卿。
槐依鄉市綠。風入舞壇清。稽古方知力。騰飛自有程。

元憲集卷六

歲晏思歸五首

歲晏坐伊川。孤襟日惘然。無功堪載策。有路卽妨賢。寵辱丹心寸。年光素髮邊。含毫雖踟躕。自欲賦歸田。
碌碌真邀寵。容容謝致君。短晷生愧脛。狂鹿老思羣。急節驚流水。浮名伴薄雲。歸歟堪擊壤。況復值唐勳。
昔寵塵三事。今懷念一丘。稻粱爭鶩飽。章服裹狙愁。心與遽非化。年驚趙語偷。欲將知止意。歸謝漢恩侯。
班固序丞相平津侯以下皆入恩澤侯表。

穎曲多成瀨。茨山亦有村。不知榮革履。便欲返衡門。邵圃瓜疇熟。陶廬菊徑存。敢言較寵祿。知退是酬恩。
世有功名羨。人將躁靜殊。冥鴻專避弋。鬪鷗喜捐軀。駕敗誰矜巧。山移卻信愚。白雲無謂我。歸意本區區。
主薦後喧訟不已

昔賁丘園聘。今嗟勢利趨。何嘗輕九九。自欲較銖銖。鉤百勞筋敗。朝三怒氣羸。因聲謝鄉校。眞賞媿非夫。
自實應踰嶺。至潛溪臨水煎茶

關塞雲西路。僧廬左右開。過巖逢石坐。尋水到源回。
源溪禪寺西。南二百里。天籟吟松塢。雲腴溢茗杯。宮城纔十里。
導騎莫相催。

致仕得請泛舟歸第

輔郡初辭節。孤舟始去官。橋頭帆影急。枕底浪聲寒。好爵云誰寵。危心且自安。賜車誠可愛。閒共子孫看。
哭子正直講

類弁王門客。橫經胃席師。頻揚四巡頌。屢析六身疑。寂寞終嘲白。侏儒詎信飢。一朝嗟湫盡。福善亦予欺。
柳嘲竹

好在碧檀欒。叢低度歲寒。何堪裁鳳律。只好製魚竿。拂水煙梢潤。含風鈿葉攢。芳陰聊奉庇。君試仰天看。
送上元張尉

馳譽光英域。糊名限選條。州臨建業水。路出廣陵潮。歸思刀頭苦。離心旆影搖。行聞有薦牘。南闕鬱嵒嶢。
送餘姚顧尉

昔意青霞遠。新恩黃綬榮。官同吳市隱。賦壓楚鄉平。天霽晨帆駛。潮回夜扁輕。千巖勝遊近。且莫棄塵纓。
送烏程吳尉

千人嘗得僞。再命尙沈僚。左右爲容晚。東南作尉遙。鄉心烏鵲樹。春醉麁廳橋。今夕羈魂枕。前知爲別銷。
送常熟錢尉

秦王族孫

吏最三年集。僚英一尉沈。清壺人映玉。勳券廟藏金。夕館淮蟾度。春篙楚汰深。王孫情幾許。芳草徧天潯。
送舒州懷寧尉孫景先省嚴親後赴職

鄉書曾擅秀。父任此爲郎。卻捧三銓檄。歸稱百歲觴。淮山瞻曉堠。皖浦轉春橋。無累徒勞歎。康車貯萬章。

送高郵葉尉

佛塔千名牒。銓臺再調符。空登拔萃目。未免沒塔趨。爨桂方辭洛。羹蓴尙及吳。振淹知孔邇。華萼映鴻都。
君卽道卿集
仙之令昆也

官況

久曠三山直。時領他局
雖書多廢空陪五日趨。文無飾羽巧。心有刻舟愚。陞戟愁飢死。關門駭寵呼。缺然偏自愧。乘馬與雙鳬。

故歲東園植竹喜今春方芳

幾日霜根地。新年綠玉陰。春來雖換葉。寒去轉虛心。乳節烟膏膩。空梢夕籟沈。何時殊實老。留遺九苞禽。
蔬食

何筍空圖貴。潘園且薦羞。肥非糠粃飽。炙恥彈鴟求。餘雍行堪種。芳葵莫預憂。伯陽真意在。鼠壤棄誰收。
浩歎

鼻濁哀吟倦。空懷浩歎盈。心同注鉤怯。功比畫墁輕。俗態驚狙怒。剛腸謝鵞爭。淹回江外客。日夕望堯旌。
昔歎

昔歎桴乘海。今悲澗隱松。連城輕僞璧。畫室畏眞龍。靜勝將生白。機亡恥合蹤。誰談龜手術。泚辭換吳封。
侍宴集英殿因過學士院舊廬有感

昔日金門署重來素髮臣。故詞多削藁。前誠尙銘紳。寶翰餘龜鎖。仙山海壁塵。更憐溫室樹。顏色老于人。
北軒院中海棠最爲舊物。

送殿丞楊備通理睦州

引籍淹閨序。監州得海壖。貪隨濤鷺驛。倦趁火城天。織紵吳儂富。今士貢垂綸漢客賢。遙知懷我處。霜月暝樓邊。

讀賈誼新書

誰謂賈生學兼之。文帝朝死憂王墜馬。生賦鵬如鴉。被召宣溫密。矜功絳灌驕。勤勤論五餌。史筆未相饒。
班固嗤五餌以爲疎。蓋不見賈生之功成耳。

行舟漢口

澤國風波恨。孤帆日夕征。山連吳樹綠。江入漢源清。鬢亂將成葆。心搖不後旌。銷魂千里外。寧是憶蓴羹。

聞胡明遠記室將至

昔歎都門別。今聞隴坂還。風烟背秦塞。陵邑過周關。松老忘年契。朱衰玩日顏。須君述征賦。方驗此塗艱。

送謝煜赴無爲主簿

懷檄倦遊都。勞勞艤客臚。秋渠沿葦蕩。春塢見濡須。林齊添賓酌。蘭荇入養廚。明年獻文地。南闕倚星榆。

攝記出城過西苑馬上作

斗柄仙城曉。龍鱗下。隄通。三竿曉義。馭十里過商中。水藉天容碧。塵依驛轍紅。喜聞何力語。應爲樂秋豐。
關外

關外崢嶸歲。河邊寂寞洲。寒雲能不雨。高柳強先秋。野靜狐狸出。沙長鴈鷺留。登臨雖信美。無賦可銷憂。
和吳侍郎寓趙中令韓王宅

平昔元勳第。多年洛水頭。荒池威鳳去。高棟野鷗愁。木老爭侵日。花寒各媚秋。猶欣賓館在。臨賞寄名流。
至日園丘攝事禮畢早歸馬上口占

祠館宵燈罷。歸驂曉轡輕。天規斜抱苑。斗柄曲臨城。路記仙輿轍。林空寶雉聲。上元新甲子。休氣接平明。
郡圃秋日二首

閨去秋歸早。開軒洒病襟。曉風凌羽扇。商氣襲瑤琴。竹雨無情碧。荷煙底事深。蕭蕭差可賞。只是恨年深。
累榭孤城側。空陂八月涼。高雲收雨意。淡日作秋光。葉落風蟬塢。巢空社燕梁。變衰從此始。何術奈羣芳。
次韻和吳侍郎偶至城西一二名園

幾曲西園路。幽深隱歲華。偶乘安道興。直過辟疆家。畦脈爭分溜。叢名各記花。身閒飛蓋遠。容易到曠霞。
佛嶺

鳳谷掩西嶺。鷺宮聯四陲。山晴巖獨霧。林暑澗常秋。風御疏清磬。雲柯抱晚樓。瓊芝徧諸崦。歲暮儻來游。
送慶州安化元處宗主簿

黃綬榮新牒。華顛惜美材。越心枝上遠。羌思笛中來。烽燼和星落。刀環伴月開。寄言棲棘地。鸞翮少徘徊。

送穎陰張主簿

早服英雄轂。胡爲州縣勞。荆璆不自露。郢雪向誰高。月鼓千聲疊。霜風萬竅號。行行星聚國。芳尺慰同袍。

送巢縣梅主簿

吳邑神仙系。梁臺英俊游。官從鸞棘試。材俟蟻封求。堂桂叨聯籍。陔蘭慶奉羞。行行離恨苦。淮月一弦秋。

孟津歲晚十首

我慙流年晚。年將我志違。終風來北怒。寒日趁西歸。野獸求羣騁。離鴻望影飛。君恩殊未報。愁憶故山薇。
地闊山川險。風高萬卉乾。山煙晨作暝。河氣晚催寒。革眼移前帶。梁金晦舊冠。胡然坐衰靡。無客餉千丸。
隱軫分河壤。崢嶸念歲華。關雲沈羣樹。樓月嘯羌笳。要路誰云騁。浮生會有涯。高哉羨門子。橫海挹朝霞。
歲籥行周矣。官齋坐悄然。脩篁全露節。衰柳不停煙。霜苦雲收陣。天斜月控弦。寸心如斗柄。常在帝車前。
曲岸羣芳歇。高臺倦目留。晉山青不斷。河潦濁難收。世路功名急。天衢歲月遒。吾生猶可養。嵩麓是耕疇。
戊苦河兼重。星回歲聿悲。頽雲埋雪樹。暗水入冰池。山疊看疑近。樓高倚更危。吞腥何日了。歸去茹華芝。
大室東南望。分明鸞鶴飛。何嘗無路往。自是有心違。隱谷松聲淡。仙區藥甲肥。行年六十一。非外更知非。
芳序雖搖落。吾生任屈伸。日催輕壁土。天赦戴盆人。宵鴈多號月。冰魚暗待春。自憐麋鹿性。晚節頓纓頻。
昔日山林願。今茲軒冕遊。祇驚年冉冉。安議政優優。小雪煙橫野。殘笳月背樓。河邊楊樹老。不是桂淹留。

歲晚感事

渥赭隨顏能飛霜人鬢新夜壺寒展刻冬晷急馳輪名美誠堪徇身閒我獨親聊持一樽酒不爲畫蛇人
息偃君恩厚崢嶸歲律遷若驚曾爲寵見嫉不因賢白日孤盆外蒼蠅尺壁前東隅雖已失忠意尙倦倦
榮路冥煩客單車寂寞州前朝有單車刺史野氛連市漲寒水夾城流塞上眞亡馬江邊獨信鷗不知芳歲晚霜
雪上人頭

初憩河陽郡齋三首

積水千陂會孤城一角存烏烏喧晝霽蛇虺喜冬溫地食荒民屋天高思國門楚優歌舞拙何處強持樽
河洛周郊會風烟晉部鄰人傳種花縣地記躍魚津梨棗知秋晚桑麻驗俗淳惟憂三載課無術効臣恂
積晦雲初罷餘光火尙流疎桐凋晚日孤扇避高秋令尹何妨仕將軍不必侯此心機息轉只好弄羣鷗
郊園連官圃秋陰半歲陰亂流橫掠野殘日倒穿林雪擁承簪髮丹藏戀闕心思歸誰作引從古怨瑤琴

曉汲

曉汲過春畦高梧待鳳欽甕思閒鑿塹瓶險畏居湄照影香釵墜獨煩素綆垂寂寥無醉轄瓢飲共棲遲
遲明出都

曉出西郊道回瞻北闕天城頭雲斂蓋關外月低弦委佩辭朝紱鳴笳逐使旂老臣三去國憑軾淚潸潸
余昔守揚大守洛今守孟三出都門凡十六年

次韻和吳侍郎以余偶名新花爲壓叢春見貺

異草來何許。低昂曲沼濱。不勝叢上意。翻作葉中春。逗藥清香遠。銜跼絳彩勻。芳心如有屬。宜在賦詩人。
余雖作名唱之者詩也。

淮南早春風雨連日俗以爲宜

淮海歲方新。層陰便浹辰。山山能作雨。物物解呈春。野鳥千聲異。江蕪一色勻。農區田溜滿。偏慰守藩臣。
和柴天休鄭舍人奉祠太一見懷之作

初啓冬冥琯。知祠毫忌壇。雲璈廣夜曲。瓊藥供朝餐。眞御扶鸞遠。僊威抱斗寒。勞君懷晤語。此夕宿坡蠻。
是夜余亦內當直。

春晦小雨

節晦春蕪歇。天高暮雨空。輕雷遙應電。斜日倒成虹。陰綠苔浮水。幽光蕙轉風。何須俗士駕。三徑有蒿蓬。
春夕

暝色蔽孤齋。空軒向夕開。花低應露下。月暗覺雲來。燭牖輕蛾聚。風枝倦鳥猜。無言聊隱几。萬境一靈臺。
有將獨鶴行都市道上者左右奔迫野態憔悴因成短韻

明心本霄漢。此路極喧埃。何意鳴臯罷。翻同舞市來。波魚憂轍涸。海鳥避風災。寄語昂昂質。非君羽獨摧。

元憲集卷七

五言長律

郡齋多疾

歌召非周陝。褒黃謝漢台。名將恩共忝。衰與疾俱來。素髮慙犀導。朱顏藉玉杯。勦勞真索莫。出處尙徘徊。且脫平津粟。誰憂長孺灰。淮陽安敢薄。臥治忍非才。

和通判刁博士屬疾次韻

退食仍移疾。消煩尙偃牀。玉姿經燉潤。松色貫寒芳。漱液仙池滿。觀心慧炬光。君素妙禪。靈解。清魂同鶴警。妙數喜龜長。且答毗城問。休回楚客腸。定知靈氣復。新句有風霜。

進讀唐書終帙

隋室重氛極。唐家景命新。地歸裂殘壤。天洗戰餘塵。自隋煬帝末。天下兵興。割裂。土壤至貞觀後始一統矣。遂納諸戎貢。爭陪二月巡。高宗明皇帝。巡。舉行封禪。瀛洲登俊老。天冊府延十八學士。煙閣盡名臣。功臣並置。像凌煙閣。輕重非關鼎。興亡要在人。明皇。寶以後。驕縱失道。遂致安史之亂。肅代復舊都。紛秀麥。前事徧書筠。長安皆丘墟矣。哲后疑圖暇。西廂訪。興至。信昭陵夷。不振然其治亂皆本于人。古頻。頃年多御。英聞中。終篇見成敗。摘句屢諮詢。青史嘉遺直。元龜遺去聲聖辰。願將稽古意。萬一助堯仁。

楊寺丞掌務西洛訪別

長安久羈宦。門巷絕卿輿。朝綬徒云忝。賓萁日已疎。何爲趨玉趾。乃肯眷蓬廬。九棘歷華選。四環承慶餘。頻叨范叔贈。時取長卿書。清晤輒窮景。高談寧疊蘇。夫何苦吏役。忽爾愴離居。交臂願從子。盍簪嗟棄予。梁郊春草後。羣樹夏雲初。安石訪吟社。少游乘澤車。一官方効智。萬里乍紆途。雅節鄙時尙。高才凌太虛。奏篇希乙覽。刷羽遲南圖。君嘗與文數
十篇未報行矣姑自愛。漢家方向儒。

中秋禁林對月

素簫中分夜。祥冀對滿辰。千門迎皓彩。一氣洗空輪。淨失金缸影。寒生露掌津。仙京全是玉。佛界卽成銀。宮瓦收蒼霧。天淵滅翠淪。網珠聊借媚。執扇枉迷真。爽籟通鳩鵲。斜光淡結鄰。孤懷無晤賞。長嘯待清晨。

寓宿南宮言懷

始寓南臺直。偏驚素簫霜。悲秋眞騎省。出沐愧山郎。自許鷗機息。誰矜鶴脰長。塵緇洛客袂。枌老漢人鄉。篝燭沈幽幔。繙經襲隱囊。杯醪冰去餘淥。硯滴瀉寒光。歲晚凋蘭佩。風乾裂芰裳。星烏繞枝倦。瑤草蔽庭荒。道爲虛心勝。情緣感物傷。勞歌少悽惻。夷路卽騰驤。

樞密東院秋日

試問山林客。胡然廊廟中。借籌終不效。數馬亦何功。歸篠荀池北。院在中
書正北回環漢壘東。四樓禁城衛
土屯馬在焉綰雲高幕潤。瑤草半庭空。乍失蒼門燕。初聞上苑鴻。涼催珍簾卷。氣襲碧簾通。虬箭天邊漏。烏竿物外風。心傾粧類鬢。髮短更驚蓬。自諗非眞相。其誰恨禿翁。婆娑君勿誚。併爲主恩隆。

贈傅法光梵二大卿兼述譯場之盛

梵劫扶皇歷。高才會聖門。五天眞釋種。傳法北邙三國舊王孫。光梵故吳王譯詁生知慧。光梵自童子便

聯聯萬戶恩。二公自先朝並加卿秩以榮傳譯齋熏光漢邸。結集盛秦園。交照無殊俗。多聞屬上根。二公雖夷夏有學徒

紛霧委。經錄燦星繁。光梵奉詔重撰景祐法寶錄十卷奏上之妙義觀心德。華音置使翻。自天傳後譯經潤文祝場千偈出。每歲

天子誕辰皆大開。譯場進新經祝壽空境一燈存。列聖文垂象。太宗真宗並賜聖教序旁行筆記源。二公作天竺字院碑鰲

拈鳥。楊宗理實一代之高文御榜鰲集軒。上既序天竺字源又御書地倚區中勝。人緣物外尊。十年參

淨職于此愧忘言。余兩參大政改使樞

寄長安端明王左丞

網轄尊華省。旌麾鎮舊秦。州榮朱轂守。公待黑頭人。從囊荷中密。仁風屏外春。才包揚馬思。政績趙張神。

鼎鼐終調鵠。天文尙翦鶉。山光函谷曉。柳色渭橋新。勅隊良家子。邀歡代舍賓。聲華今絕擬。事業古難倫。

願我非賢宰。惟朝念老臣。官銜溫室殿。城壘富平津。有秩皆踰分。無功可活民。餐霞聊卻疾。面壁更求真。

野屐茨峯路。僕耕疇正近具茨山下漁竿潁水濱。拳拳知止誠。行及謝交親。

講詩徵章置酒崇政殿講官兩府宗室近臣皆預會奏御

經藝尊詩學。書林眷講臣。禮將恩並渥。道與日俱新。聖問臨篇裕。王風卽席淳。妙談開寶帙。高宴寵華紳。

朝笏儀庭鷺。宗藩瑞世麟。天漿聊挹斗。帝曲豫回春。惠洽需占象。歡留景駐輪。諸儒稽古力。千載頌逢晨。

次韻和觀文王尚書謝余寄示新詩

久免台階重。頻遷郡守優。朱輪眞冒寵。白髮自驚秋。事往情多感。年衰氣失遒。徘徊河裏望。西北便望河內凋落漢庭游。俚曲聊成唱。眞筌不暇搜。空思益者友。安議賦家流。六義二賦心町都遺跡。辭林幸見庥。豐謠連井甸。華札滿輕郵。已許瓊爲報。何妨漆更投。濟川毋諠我。歸夢在漁舟。

都下燈夕

火樹鬱岩嶢。山車切絳霄。層樓移旦闕。複道借星橋。花散非因雨。霞多不爲朝。聲來知佩近。香去惜車遙。遇扇還聞曲。逢臺卽聽簫。更籌且莫盡。綵月正飄颻。

元會觀禮呈僕射相國呂公

乾歷端辰啓。王庭慶禮昭。虞篇五瑞輯。漢句九賓朝。物象開蒼陸。聲明薄絳霄。寒依朱燎盡。春入綵旗遙。舞翟凌干密。蟠螭壓陛驕。晨光生劍珮。和氣引咸韶。寶極瞻垂袞。星階集珥貂。班時先正夏。拜祝故尊堯。山獻稱觴壽。雷傳浹宇謠。燕需雲布象。恩瀝斗回杓。任士虔方聘。居鄉列瑞條。須知容典盛。畫一賴曹蕭。

冬至觀兩宮盛禮奏御

帝運姚華協。天元漢歷長。三正來復旦。萬壽此稱觴。洛宅均中景。塗山采舊章。禮文窮竹素。歡意動梯航。稷野茅聯位。軒筠穀向陽。中天倚華闕。大火啟明堂。交鑲鑿鑿隊。填街隱赫裝。九關凝協氣。複道竚清光。子事蒸蒸極。宸儀穆穆揚。母慈尊莫二。君拜社無疆。飾喜仙園奏。薰空佛土香。含飴先侑宴。襲袞始賓王。

闕籓宮門狄。誰何陞楯郎。長紳紛拱著。珍珮藹森璋。樹次天開帟。儲恩斗具漿。風烏迎細轉。霞燎儼相望。辨御辰承蓋。呼轡輦出房。雲咸薄金石。星日上旂常。逸綴朱千動。多儀的馬驤。麟題公有姓。鷺羽客分行。上宰陳瑤爵。黎賢扑繡裳。祈齡後天老。介福委山穰。翼翼心同竭。渠渠澤載霽。詩絃滿坑谷。庖味益圓方。盛掩鈞臺舊。儀高魯觀祥。深仁跂喙逮。嘉唱股肱良。茨夏隨天步。魚龍屏戲場。晏溫澄象緯。滲漉暨要荒。瑞典精銷禊。塗歌聖擇狂。樵蘇無發哂。崖路蹈皇綱。

出都赴鄭作歲

辛丑

初免鴻樞任。無庸白髮身。衰年雖去國。榮路尙妨人。官借荀池舊。恩加漢節新。鳴鐃先繡轡。轂騎挾朱輪。梁雪初收臘。榮波漸溢春。且持寬大詔。行及勸耕民。

明堂大饗慶成奏御

盛節嚴周配。宏模軼漢儀。還因大庭敞。就展合宮祠。揆序乘霜籥。涓辰襲寶龜。重檐開闕窳。綬牖列參差。蒼邸尊圓覆。嘉牲接厚祇。五精均帝饗。三聖佑靈嬉。備物先昭德。長言各奏詩。美光浮羽戚。休氣冒尊彝。虛次大彌健。還衡斗輒隨。禮成無墜典。神醉答繁釐。解作初占雨。恩濃遂浹肌。歡心偕岳抃。赦驛與星馳。載瑞催麟筆。包鋒促虎皮。具臣何以報。拜首百工熙。

次韻和州府吳大資病愈後見寄之作

冠蓋山川舊。星灰五載餘。辭榮唐院使。

公以病讓還宣徽使銜

麾守舊尙書。

余三改藩壘敘遷省坐

弓影臨觴悟。舟心觸物虛。

塵埃題宇壁。汙潦汎杯渠。公洛中小園開爲水所敗。皆昔年勝跡。世事多榮悴。天均任慘舒。交情非苟合。筆力自雄摬。蒲坂軍旄重。河橋驛轍疎。三成路僻。驛罕通。歸耕年漸逼。鄉思滿柴車。

訪李生郊居

林下一逢迎。幽人此養生。歌嬉入堯壤。種樹漏秦坑。歲晏農困實。賓歡野饌盈。松黃浮晚酒。薇蕨萼晨羹。霜樹榴房綻。陽畦藥甲榮。歸軒且莫駕。孤月在山楹。

皇子慶誕奏御

積德皇階厚。詒孫寶訓長。祺宮前祝祉。猗殿此開祥。卽夕銅吹律。先時日抱光。由來七鬯主。更重室家王。瑞莢隨辰滿。仙蘭備浴芳。已知周卜永。方驗宋宗彊。京甸歡餘霈。宸帷溢慶觴。史臣雖弱翰。行及紀元良。

初春宿雨

泱泱朝雲簇。淒淒暮樹繁。光生斷冰水。色暗夕陽原。牧犉隨歸笠。棲雞占鑿垣。雲輜寒未發。鴻弋暝逾喧。庭狹坳堂隘。簷高梗溜翻。泥塗采薪徑。煙火緯蕭門。桂偃幽巖蓋。蘭滋舊畹根。撫柯兼擷秀。併是燼王孫。

洛城秋雨

霜月兼寒雨。高齋伴寂寥。已能陰漠漠。更自韻蕭蕭。宮迥天低闕。津長霧失橋。蘆灰迷桂暈。梁屋掩霞朝。煙重蘭摧葉。風淒柳勁條。遠沉緱鶴唳。輕送洛鴻飄。甕園應餘汲。芝巖定長苗。有人思舊隱。歸駕不須招。

從幸化誠殿觀芝草奏御

協氣流羣卉。華芝茂禁庭。螭蜺蔽珍構。困蠶合祥經。露彩滋瓊理。雲葩矗蓋形。周仁慙道葦。堯德讓階蓂。被曲宸章爛。傳芳信策青。從臣叨寓目。歡意浹三靈。

崇政殿試御試貢士中昃不暇食因私賦

曩聖勤周日。虛懷軫睿思。方圖天輯命。詎恤食踰時。坐誠繁機壅。居忘側景疲。眷賢資德飽。詢善慰調飢。事帝心還小。康功服更卑。巍巍七百祚。歸報諒由斯。

寄題滑臺龍圖梅君新作西溪

遙羨西溪境。鳴笳從賞頻。蒲蓮應得地。魚鳥更留人。樹密藏川雨。隄長截路塵。清移嚴瀨月。歡陋習家春。按曲吳歛伎。酬篇祿帖賓。太平三輔樂。須信屬才臣。

奉詔賦後苑諸殿牡丹

靈囿先春啓。聯跼應候開。根隨一元毓。瑞協兩宮來。吐豔迎丹旭。揚芬散薄埃。斂煙交鈿合。側露並霞杯。耀彩珠翻樹。薰空蕙借煤。化工殫巧意。不爲翦刀催。

遊大明寺

總轡出西垌。寥寥旭宇明。叢岡森地秀。飛塔恍神行。惠味霑仙露。疲心識化城。遠香來不斷。空梵過猶清。坐惜忘機晚。居慙縹緲榮。撫懷今古恨。高世友僚情。顧慕羣芳歇。徘徊極野平。低雲參駐蓋。寒木隱前旌。風轉松添韻。霜餘菊挫英。碧垂天勢匝。紅上日華輕。壘廢麝麝樂。池荒鴈鶩鳴。宮垣除滌國。爲吳故宮在此臺址

畏軒兵。建隆行闕勝踐欣同適。沈憂悔自嬰。理融無物我。神照罷將迎。絢藻春供麗。投珍珮合聲。莫嗤三嘆拙。聊謝兩心傾。

正月四日侍宴紫宸殿契丹使預會

黼座披天幄。朝簪集玉除。人來重塞表。年是上皇初。時新改元仙劫萬軸移神島。千門敞微廬。春雲低借幕。瑤斗近臨車。露渥仙杯溢。風和法曲徐。劍丸爭獻巧。橦索競凌虛。老朽優詞麗。交竿舞態舒。盤豐行炙數。冠重賜花餘。瑞境儀韶鳳。歡心在鑄魚。太平同樂意。應有史臣書。

季冬立春日侍宴垂拱殿契丹使預會

臘破寒猶在。春融氣已回。千祥隨寶勝。是日內出金銀幡勝賜近官萬壽入天杯。燕駿戎輸寶。虞韶律應灰。樓前風著柳。殿裏雪裝梅。妙戲魚龍出。歡心鳧藻催。欲知邦好永。弈世會鈞臺。自先朝以來通好今再世矣

郡棲望嵩少作

曠蕩三河闊。東西二室連。埋雲峯樹短。抱日嶺霞鮮。黛壓周南野。嵐薰鞏右天。崢嶸元氣外。磅礴太虛前。斜麓橫包壑。傾崖碧逗煙。巢荒堯客隱。笙斷洛儲仙。夙尙臨風結。幽懷徠里縣。功名青史後。才器散樗邊。整頓登山屐。簽題煉藥篇。采芝應有路。種玉得無田。喻指存真契。如灰息世緣。寄聲鸞鶴侶。千載共來旋。

和參政丁侍郎從駕出獵

詔蹕承冬令。郊畿開狩場。鈞陳來作衛。衲服正騰裝。表野千旌合。舒圍萬騎張。清塵風效職。捧轡日呈祥。

寶時遙驚霍。天弧卽射狼。林空平陸險。雲斷見鷹揚。猛圈聊夸漢。恩羅遂祝湯。數功浮白飲。均惠割鮮嘗。別苑黃山外。仙城北斗傍。輔臣忠力盛。餘思滿雕章。

見白髮有感

昔人三十二。已賦二毛悲。況乃踰強仕。何能怨始衰。星星簪外出。冉冉鑑中垂。顏負前丹渥。心驚故石移。袁公憂漢室。蜀客問湘纍。此際重搔首。孤懷君詎知。

元憲集卷八

五言長律

賦風得仙字

噫氣含朝籟。離星動夕躔。威靈隨漢筑。煦嫗上虞絃。清拂蘭臺客。徐飄鄭圃仙。來應憑虎嘯。去不待蛇憐。塞外淒天馬。林端飽露蟬。入松和韻古。轉蕙逐光妍。黃落汾睢地。悲歌易水天。如何箕穎上。獨取一飄捐。

新晴

夕霧休殘雨。霏霞側半輪。溪河雖早夏。隴麥尙餘春。灰月收全暈。泥龍落故鱗。高花樹端溼。芳篠簞梢新。雷去壺猶電。風來扇未塵。橫琴聊坐嘯。何必墊游巾。

大寒夜坐有感

河洛成冰候。關山欲雪天。寒燈隨遠夢。殘歷卷流年。杯共芳醪凍。簪依短髮偏。毫釐九牛畔。頭角兩螭前。冶外金休躍。山阿溜或穿。飄入誰怨瓦。使鬼尙須錢。招隱芝巖路。盟真玉笈篇。何當坐清潁。閒洗世中緣。

留臺吳侍郎時泛小舟臨玩清洛輒成拙詩奉寄

聞有滄洲尙。時時清洛濱。烟波能弄楫。沙鳥不驚人。佛髻寒排岫。東瞻嵩少星橋晚跨津。西沂天津湍鳴知亂石。漪碎覺跳鱗。玉七停餘劑。華纓濯故塵。今無李元禮。李嘗爲河南尹。與有道同舟。仙袂許誰親。

簞下寒食

舊節雖龍忌。中都富物華。有行官戶柳。無數苑牆花。飲市喧銀管。優場隘轎車。街塵盤馬燥。樹日鬪雞斜。踢鞠將軍第。吹簫貴主家。金丸隨落宿。絲障亂朝霞。水暖船爭旆。風長鼓應笳。池邊人酩酊。殿裏客伊亞。烏加反。畫卯賓盤盛。香糜賜品嘉。只應王澤厚。行樂徧天涯。

過留臺吳侍郎新葺市小園

解選幽棲地。園居壓野開。清風無近至。東望風煙。特爲虛曠。雙派卽同來。二水夾流。合于牆外。度約幽人屐。臨渠醉客杯。倒根檉擁岸。初籜筍穿苔。溪石行堪釣。沙鷗已罷猜。宵游應更好。長負月徘徊。

小園

節物過芳苞。幽奇勝近郊。先秋蟬棄甲。背歲鵲營巢。池小萍周岸。筠低露浹梢。標梅資宴豆。賜臘佐晨庖。夕塢禽聲亂。芳蹊屐齒交。茂叢羅宅菊。長柄庾園匏。尸竊虞官謗。嘉肥媿遞交。披襟時一至。未塞學心茅。

次韻和吳侍郎佳雪應祈豐年有望

使節馳羣望。神休答帝祈。同雲先北合。餘霰遂西飛。近野銀開界。遙山玉吐輝。梅飄知臘破。絮舞誤春歸。謝市人驚麵。曹風客比衣。稍添波面白。併作土膏肥。苑閣沈蒼霧。川明失素磯。獵場漫獸迹。農畝罷民欸。興覺龍沙接。寒將裸壤遼。光迷梁日曉。潤息甕畦機。仙斂誰連袂。幽蘭更撫徽。恐應緣麗唱。歡意徹天扉。

次韻和張丞相攝南郊喜王畿大稔

上袞躬祠節。鳴騶出禁城。傳霖前灑潤。堯壤徧深耕。野色華兼實。歡謠斷復賡。民依大鈞播。政絕侈心萌。秋斂蠲徭版。鄉酺貯醉罌。露黃開徑菊。霜紫落園荊。蹲芋連區熟。飴茶蔽溼榮。日圍銜漢苑。天極抱秦京。聖旦千齡會。時乃萬寶成。福釐前席問。元首載歌明。亮采神龜合。摛文瑞鵠驚。徒慙下里曲。仰頌泰階平。

從幸翠芳亭觀橙

祕苑羣芳歇。仙橙瑞實黃。根非淮枳變。味冠禹苟嘗。宮掌遙分露。卿雲別護霜。金垂枝杪重。星隱葉中光。土效無偏色。天吹不斷香。臨觀回羽葆。交薦佇瑤觴。給客誰矜蜀。郭璞蜀記有客論都謾記穠。南都賦有穠橙鄧橘堯仁均異賜。休氣滿簪裳。是日折橙于樹徧賜從官

從幸飛山教場閱武奏御

武節遵時訓。神鑣御素秋。天風掃閭闔。星氣射旄頭。土肅先庚令。民謹載路謳。雷車鑢閭石。蚩矢裂熊侯。旂首疏千隊。金聲勒萬騶。較能觀樹槩。超力賞亭樓。爽氣生威武。皇歡入宴羞。垂紳參注靺。凱樂間鳴球。雲夢誰夸獵。岐陽枉議蒐。欲知神武世。七德共凝猷。

集賢張相國誕辰頌德十韻

顯印傳侯刻。圯編翊帝圖。還生王國佐。來煥泰階符。瑞紱雙嬰舸。祥蓬四射弧。從龍參震邸。附鳳入星樞。嗣正調元席。宏開造物爐。儀刑瞻魏采。勵翼矢臯謨。穆穆資同體。拳拳避碩膚。誠雖貫霜雪。誠甚勒盤盂。師石闕爲壽。仙春道有腴。欲知難老意。八柱與天俱。

參政東平侍郎誕辰紀德

仲冬三日
壽夷簡

帝業資寅亮。鴻鈞翊太寧。天開釣璜胄。家襲降崧靈。復九萌陽筦。生三瑞砌冥。毓賢茲表日。衛世遂傳經。覽德重光旦。參機茂宰庭。羣生倚舟楫。萬化入丹青。坐納藏山史。追論象服刑。真廟史法天聖格。令公皆總之。前籌罄中。悃。吉陳石基局。國圻汾陽考。人祈衛武齡。孤心知所嚮。帝座六符星。

故相國沂公建設學官實寵茲土近聞生徒寢盛姑復慰懷因成拙詩一章奉呈州學官因以勉導來者

舊學開宏構。斯文聳奧區。由來漢丞相。善教魯諸儒。自昔升堂訓。于今避席趨。照函經滿帙。繪壁禮成圖。集講占庭鱣。懷賢詠谷駒。道存終拾芥。聲濫或逃竽。一黃宜無止。連城莫自沽。育材真孟樂。希聖乃顏徒。寸晷堪輕壁。繁英慎奪朱。霧蒸還作市。風至卽名雩。曉圃林如泮。春郊水是洙。從茲弦誦地。不復歎榛蕪。講讀春秋徹。篇侍宴崇政殿奏御

睿覽凝星壁。才儒集露門。披經窮魯記。摘句辯堯言。曩例襲成衰。先猷化啓源。香雲收寶袞。甘醕澆慈樽。飾喜韶音縱。均和玉色溫。史臣叨偉觀。炙行願殫論。

正月望夜侍宴宣德門呈昭文富丞相

帝闕開金狄。仙輿下玉京。建春天上斗。不夜海邊城。佛火依山出。星榆夾道明。清塵隨漢蹕。紫氣護軒營。皓月樓前近。鮮風仗裏經。煙雲供瑞色。簫鼓獻譟聲。梵宇千花落。祠光衆雉驚。宸儀收寶扇。台座冠朝纓。

客守宮門燎。雞傳微署更。皇杯頻賜勸。應爲秦階平。

下元日扈蹕朝拜景靈宮

令月開眞館。宸游薄太霄。躬行原廟禮。更作葉宮朝。寶扇森排羽。仙輪恍御飈。霞觴浮桂液。瓊饌薦芝苗。日霽樓先曉。天深樹不凋。繁禧將浩劫。世世會揚寥。(案) 祕要仙經仙宮中寥陽殿。此云揚寥。未詳其義。

苦熱

溽暑南方候。貞光大火天。流金空畏日。墮水忽驚鳶。掌露涼難挹。心瓜疾未蠲。鵬妖卑溼地。魃虐蘊隆年。虛谷全收籟。焦原欲出烟。洪爐方扇物。何處預陶甄。

庚午春觀新進士錫宴瓊林苑因書所見

祕苑儀星地。羣英得雋年。飛綏鯨浦右。供帳斗城偏。表道槐陰直。凌氛柞影圓。叢楹開玉宇。華組會瓊筵。湛湛融君渥。渠渠獎士賢。銀璫尊右席。中貴人主宴綠幘佐雙邊。太官先置飾喜優坊伎。均恩醴禮錢。諸君子合錢以勞供帳優伶之。沼浮澗酒淥。坻聚舜庖羶。場迴歌聲合。風迴舞節妍。柳疑添紺幄。鸚解啄鳴絃。臣舊心傾日。需雲象在天。梯臺齋睿什。中席使者以御詩賜鈿軸照儒篇。復錄印大學需行二篇以賜寶思垂霓爛。歡聲抃岳傳。珍臺紛蹇產。翠氣浩宛延。此以下並述苑中池上景物之盛池訝陽烏浴。橋疑漢鵲填。千夫拔河索。三令奪標船。帳殿滄波匝。鈎梯複道連。瑤甍軒鳳羽。雲島壓鼇顛。犧船馴靈囿。天甍蔽大田。江頭拔蘭紫。林下摘櫻鮮。玉藻初盈沼。神芝欲冒廛。陽構連禹洫。陰石駭秦鞭。冰靜恩魚出。園空瑞鵠旋。繚垣包井落。別渚上風烟。金埒爭鑣地。珠翳射雉阡。

去輜雷遠陌。歸袂藻平川。乍集儲胥外。還經驪娑前。子雲嗟寂寞。無思狀甘泉。

初夏三司直宿

薰序更朱籥。宵弦落翠簷。四月下弦夕人同散騎直。天與大夫醒。予性不飲執掌曹留事。羈孤坐刻銘。整冠誰辨謗。隱几獨忘形。夜色先歸樹。涼飈欲破櫺。鎖屏來疊鼓。卷幔入疎星。綵羽依枝倦。飛花墜席馨。憂沈雙蝶夢。病學一熊經。道有支離粟。心無屈曲屏。汰沙如未及。擬殺著書青。

漢上春雪

繁霧乘陰結。寒英匝宇飄。風催洛妃舞。春伴郢人謠。逗浦添珠媚。繁叢掩柳嬌。樓空先月白。野闊助天遙。稍傍魚冰合。還依雉隴銷。一樽無與晤。幽思滿蘭苕。

從幸儀鳳閣觀雙竹奏御

曲密叢櫟地。檀欒瑞植場。靈姿紛並秀。圓節儼相當。聯景知宗茂。同根識幹彊。翠浮睢苑日。寒待帝園霜。合響天供籟。分枝玉薦蒼。卽看蕃寶實。儀鳳就徊翔。

送司馬待制守河中

久貳甘泉計。新陪丹府游。天深巢鸛閣。地重鑿龍州。驅弩軍裝盛。依蓮客藻遒。別魂驚黯黯。循政佇優優。舊時連睢遠。長汾抱晉流。劬農知俗美。虞畔記耕疇。

夙退禁廬

書訪殊無補。晨趨敢憚勞。官班唐內使。文牘漢諸曹。公吏何嘗案。邊兵久罷廛。驛沈晝插羽。朝絕法吹毛。殿樹秋陰薄。仙盤旭景高。君恩如許重。聊比戴山鰲。

度支蘇員外耆以再續翰林志見遺輒成酬贈

先烈光朝右。英才出慶餘。公卿太丘世。父子馬談書。首牘標宸藻。聯篇敘禁廬。摛華毛得鳳。刊畫魯無魚。當備芸籤目。俄光璫牖居。漢家求異說。高致掩虞初。

宿鹿門寺

寶剎翔鸞地。靈祠刻鹿門。天風奏林籟。海日破巖昏。轉眩三休閣。莊嚴兩足尊。峯回徒覺秀。瀑遠不知源。花拂談經席。蓮沈記漏盆。道場欣象伏。心境息猿奔。逗理機如電。觀空性復根。三車俱有路。何處駐歸轅。

自訟一首并序

余自洛移許公餘有宴坐之勝偶感曩事多所悔尤類非他人所知因題曰自訟

右輔朱轡守。南宮革履臣。孤螢難助日。病木獨依春。暗懦疑蛇客。愚忠數馬人。誰知溫省樹。自誠魯堂紳。監令車中席。江山扇外塵。何當能浼我。初不彊均茵。事往方成悔。猜除且瑩神。由來矜百鍊。從此惜千鈞。素髮慚華冕。虛舟謝要津。洗心良有謂。佞佛不無因。案上仕書局。眞語謂書一齋中梵氈巾。更須窮僻地。香火報昌辰。

郊報紀事奏御

陽燎修鴻報。齋居被至誠。還登八觚時。親用一元牲。瑞月隨黃屋。車駕始至六次而雲霞銷寂月色輝澄鮮雲抱紫營。天香浮玉帛。霄籟避咸英。車駕入帷宮風已前息至陟配文交舉。景祐二年三聖並侑今始以太宗陟配來同福備成。均休敷愷澤。冠朝讓尊名。遇者許以寶元改冠數號及肆赦則因用紀元以示讓德喜動吹葦氣。歡流浹字聲。空參堯壤末。試頌泰階平。

大禮慶成

帝揆三微歷。郊嚴七里壇。對修清廟饗。來接上神歡。闔闔開金狄。鉤陳扈玉鑾。軒游葩蓋密。漢兆紫營寬。電策千騶躍。雲柯萬戟攢。清塵風命伯。占表日名官。瑞羽嚴齋邸。仙瓊飲露盤。啓毛牲辨栗。啐爵醕浮蘭。合樂迎天籟。高煙破夕寒。六飛回左御。雙闕敞南端。雍鷺翔賓紱。星雞集赦竿。卽時恩作解。先此化勝殘。善頌康衢溢。鴻名寶牒刊。貢圖包禹計。王業詠豳難。戶有更錢復。朝無賞印刊。史臣叨從祀。宣美愧濡翰。

元憲集卷九

五言長律

後園秋物

秋水清能淺。秋聲斷復尋。衰荷欹似扇。新菊碎于金。匏熟猶垂格。籐乾倒附林。日光寒轉淡。山色遠彌深。索索羣芳歇。幽幽妙慮沈。薄言謝病晚。悵望丘中琴。

寶鑑

寶鑑驚沉影。仙駢鳳翼轉。腰輕時待舞。眉細不藏愁。洛館迷羅襪。秦桑露桂鉤。電微開笑靨。珠滑入歌喉。百子宮池暮。千絲越網稠。生香徒辟惡。織草未蠲憂。燭短鴛鴦被。更闌翡翠幃。月寒喧藥杵。海闊漾霞舟。公子常逢燕。星姬鎮問牛。彫胡容一薦。溝水自分流。

河上歲晏

久覺宦情薄。何堪星歲徂。冰魚寒不動。沙鶴晚相呼。日短揮戈舍。天閒造物爐。河澄諸浦涸。山禿萬林枯。感爲中來遠。心因不倚孤。虛名三品祿。儒政五州符。稷契熙鳩祚。蕭張翼漢圖。曩賢真命世。今忝劇非夫。狐偃腥臊肉。隨何腐爛儒。是非均一馬。多少任雙鳬。念老歸歟嘆。銘恩慕爾軀。風聲猶栗烈。酒意近屠蘇。薛縣能琴客。桓家善笛奴。歌吟聊自適。何必矢嘉謨。

詔下有感

釐席思賢久。公車下詔新。金酬燕市骨。蒲裹漢家輪。署行鄉論秀。觀光國有賓。臺招能賦客。關識賣符人。三府催偕計。諸儒待聘珍。揆天持筆距。連袂照袍銀。丹穴皆來鳳。靈淵並躍鱗。請行多下客。答策有平津。榮路爭高足。孤生最濫巾。一鳴方及旦。六律肯遺春。類鵠猶煩刻。成龍不懼真。縱無清夜誦。猶繼壤歌民。

次韻和吳侍郎自號樂城居士

世有生賢運。人歸得性場。沈約閑居賦有得性爲場之語。朝端慕安石。民里祝庚桑。蛇影逢眞悟。龜靈取數長。仙畦種芝圃。佛室雨花牀。寄傲多行樂。觀心或坐忘。柳溪能作暝。竹塢別供涼。慧露霑僧飯。幽霞照客觴。臯夔真有自。箕穎更相望。留務尊臺簡。私游費囊裝。側聆圖任功。安得久彷徨。

給饗禮成

孝饗邦儀重。親祠祐室開。推尊二祧合。獻力九賓來。寶蔡前涓日。祥雲近弭災。宿齋之夕小雪應時行事太宮景氣澄霽。鉤陳嚴法仗。縣蕝謹容臺。祓坐皇爲邸。登車斗轉魁。三辰隨藻袞。百末湛雲罍。徧裸靈心像。終歌帝祉隤。華紳紛嶽抃。端闕儼天回。蠅筆言絲慎。雞場赦鼓催。好生先祝網。作解遂成雷。賁有戈丘帛。刑無棄道灰。須知豪福意。萬事入康哉。

西都官屬咸備尹政得以仰成暇日池園使同塵外因書所見以志一時之幸仍以東園吏隱命篇云

誰謂留都劇。翻同小隱年。沐頭休吏日。閉閣讀書天。竹町能依沼。山樓解納煙。瘿牀閒擁腫。禪庵瘿。尤奇。荊棟
自連蜺。草堂在東南隅。岸闊沙留鳥。波平樹繫船。雨荷朝橐重。霜果佛脣鮮。玉甃浮杯地。流杯亭。冰涵給釀泉。醴泉井。絕
甘涼。法府中號。處陰靈蔡老。舊美龜子園。錢文僖愛之。給背塢晚廳眠。二虎。奕思纔知路。琴歎肯要絃。不知
冷泉法酒。處陰靈蔡老。二卒以守傳云三十年矣。全于二物皆前賢之比也。扇聲方樹外。屐齒野橋邊。宮鑰雖尸寵。巖廊合避賢。有恩淪骨髓。無術効埃涓。
圭祀田供粟。公餐月費錢。不知瓜代滿。癡尹戀山川。

正月望日車駕謁會靈觀置酒祝禱殿

上月神燈節。年康警蹕游。蒲池渭陽廟。銀闕海中洲。羽扇排雲出。鸞輪抱日流。徧升均瑞祝。合宴寵靈休。
寶展霞明坐。春山彩作樓。鸞歌參帝樂。麟脯助皇羞。斟酌堯衢飲。驚呼漢殿優。天襟知衆樂。處處駐宸旒。
是日復幸祥雲寺。上清景。靈等宮相國慈孝佛寺。

求遺書

崇政殿御試貢士求遺書于天下因私賦。

政革秦餘暴。文興漢德優。中經雖並集。逸典更旁求。使節褒遺訓。儒林補大猷。家無藏壁恨。人弭挾書憂。
探穴資遐覽。燃藜圻對讎。因斯流略盛。終古冠緹油。

醜石

磊落離幽壤。沈潛莫記年。支機形迴出。蘊玉勢相連。空穴雲猶抱。坳紋溜欲穿。虎蹲休怯射。羊叱待逢仙。
峭拔希千仞。參差異一拳。詎聞輕宋瑛。可要逐秦鞭。翠時晴軒影。寒生曉檻烟。到公某未勝。張顥印虛傳。

齊碣思閒館。圮橋意舊編。何當成五色。鍊質補媧天。

登龜山上方寺

雙樹遺眞宇。青鸞切紫氛。路盤千嶺出。鐘逼九天聞。林影隨崖斷。泉聲遇石分。曉風先得日。春崦易藏雲。佛果常軒落。仙苗護砌薰。客塵聊自拂。稽首貝多文。

官況

發策非鄉秀。瘵官玷郡聯。恩深育莪沚。技薄戴盆天。病骨三鍾粟。銛鋒一割鉛。懷能眞貶鼠。惜己甚寒蟬。吏笑移書臥。人譏面壁禪。曹符憂倥偬。邑教昧平鍰。席上巾醺酒。齋中易絕編。隙塵吹曉日。甕隧引春泉。戒養聊馨膳。將蕪敢命篇。區區犬馬志。何術謝陶甄。

次韻和侍讀梅學士秋雪

秋字霜華極。翻成暮雪飄。影迷霄桂滿。氣助海鐘調。梅蘂裝宮樹。蘆花著浦荇。喜延梁客酒。愁敵洛人貂。碧瓦千溝麗。銀塘一色消。雅篇工狀物。精思入參寥。

對雪有寄

芳歷崢嶸歲。平臺沆漭天。初驚飛礫集。坐覺雨花妍。未夜珠還乘。非春玉作田。何嘗甘絮後。正是占梅前。亂影都難擬。幽光只自鮮。辟寒金貯屋。障淖錦裁韞。回旋凌波舞。輕明飲露仙。去應迷粉水。來欲助瓊筵。有浦皆捐珮。何牕不列錢。幽蘭君自許。儂意怯么絃。

郡齋對雪

節晚雲雖暗。年豐氣自嘉。乘寒初集霰。向夕遂韜霞。緩舞先縈洛。妍歌不待巴。無聲來物表。一色共天涯。露失仙人掌。春驚驛使花。拂簾珠浙瀝。裝樹玉查牙。護石雲慙素。開樓月讓華。海邊鷗誤客。遼左鶴迷家。粉液塘冰厚。瓊苗隴麥斜。中邦盈尺喜。何必問龍沙。

夏日出池上

節候春雖往。年華暑未殘。蓮香開佛座。竹老退劉冠。戲渚藏蘋尾。鳴臯濯素翰。堇葵紅不一。蒲稗綠多端。宜物心無對。深根氣自完。功名俱畫餅。虛玷擁旄官。

清輝殿雙頭牡丹

禁籞含暉地。春英浥露天。萬柯蒸協氣。雙蔕應祥篇。倏日香彌酷。乘風豔欲然。聯葩宸屋外。交影帝觴前。詠掩華跗秀。名均紫脫妍。朝綏歌茂貺。聲冠億斯年。

瑤津亭同窠雙頭牡丹

太宇星津曲。靈葩帝囿中。丹房忽三出。寶豔更雙融。采絢仙囊露。香翻沛筑風。柔祇寧愛寶。元化自爲工。草讓中唐瑞。蘭嗤下畹叢。甘泉宸象洽。無獨賦青葱。

送荆南李學士

逢旦光華盛。登賢命數優。郎星太微後。史局道山頭。遠咫堯心屋。疏藩禹貢州。使旗飛隼出。臺劄偃波留。

舊賜蕭蘭被。新裝驪駟。陝分歌召伯。屠餞寵韓侯。澤國龍爲節。桑郊鹿並輶。齋中無煨酒。鈴下識輕裘。鹵簿分賓帟。江山入宴樓。蜀波餘柿盡。楚野惡氛收。後乘追文學。先春召督郵。漢司敕爲政尙寬。每立春日召督郵回府。暫稽華黼賜。聊聽昔襦謳。父子雲屏隔。鹽梅寶鉉求。歸來循吏政。終古冠緹油。

夏日對雨

岑寂省廬幽。諸曹吏始休。空煙催樹晚。急雨借庭秋。暮影層波動。簷聲萬綆流。縹牆明疊蘚。坳徑聚浮漚。亂溼綠虛隙。微涼襲翠幃。拙艱兼寓直。潘鬢怯搔頭。

從幸親稼殿觀新秧稻奏御

宸辰尊農扈。滌池入禁廛。耨區周耜熟。分墾禹溝連。苒苒香塍色。油油瑞畝煙。弭災消暴蠱。迎稔嘒鳴蟬。國佇曾孫稼。天臨近畧田。叨陪凝蹕賞。慙乏夢魚篇。

送刑部葉郎中出牧姑蘇

星紀吳開國。雲司漢望郎。新陪豹尾乘。詔恩同陪大禮後遣。便襲虎頭囊。竹箭分兵契。鍾官辦使裝。賜裝錢二十萬。始爲恩例。苑鶯留祖席。江鶴避歸橋。世往高臺露。春餘野徑香。欲知民樂意。訟樹接維桑。公先墅在雪溪。與蘇臺接壤。

訪宋氏溪園

偶作城隅逝。圖在郡城之左。居然物外期。林風飄易覺。山雨石先知。藤老猶依格。溝斜更會池。看蟬琴誤曲。過樹路成岐。節近吹花酒。歡留敗襖基。主人名族後。嘯竹客忘疲。君故僕射文安公之子。

仲微毀承以余多難退居洊貽誨問復緘新什以勉病軀扶力牽課聊抒謝戀
樸遯參邦彥幽憂負主恩投身采樵路脫籍上車門病肘垂楊老塵眸覆鑑昏於陵三咽味楚澤九升魂
喘甚吳牛憊名非衛鶴尊簞瓢舍桑客井臼寄孥村引重繫心照銜哀託涕痕餘生何足問姑學牧雞豚
秋日出沐感懷

落落窮閭靜蕭蕭晚歲昏臣飢徒索米童小未應門清世爲塵誚私家出沐恩斗回非挹酒天遠詎兼盆
腐爛翔鷄鼠青黃斷木樽容容誰覬福栩栩自交魂衰柳空烟穗寒苔疊雨痕鳴蛙沈故沼噪雀戀空園
有客嘲黔突無人賞負暄終期六百石初服臥丘樊

夜出芙蓉堂

北沼涼歸早西軒火正流螢光偏愛夜蛩語最知秋好月因雲暗清風爲樹留烟來昏翠幙霧下失滄洲
河轉疑天側星回恨歲遒惟餘雙鶴唳不減到林丘

夏日久雨

澤國梅蒸早郊雲泄雨多陰泉湧階穴重霧宿庭柯月魄藏仙馭山頭洗佛螺朝虹飲江曲夜電發崑阿
纖簾清初暑香薷辟舊疴官閒門自靜不爲翟公羅

參政李侍郎宿齋中書累口不陪歸馭因成拙句奉獻

攝饗獨祠令精心屬輔臣齋房貪結佩歸軾阻均茵鵠鼎庖羞潔雞枝殿樹春坐凝虛室白行被大宮神

政竚疇咨若。朝瞻已事竣。三秋懷盛德。方信採蕭人。

和運使王密學見賞公醢

公秣豐秋釀。兵廚絜燕鼎。如何勤使傳。不許酬離杯。使旌薄暮出城飲錢皆略蟻甕方涵液。鴟勝幸載醅。歡游雖暫隔。飛藻已先回。左手螯初美。東籬菊尙開。故人寬禮分。一笑竚行臺。

陳州獻瑞麥圖奉詔作

堯壤環中甸。周甿冠百昌。時均十雨潤。天報兩歧祥。善氣滋繁粒。薰風擁翠芒。初疑禾異畝。更覺黍非香。獻狀宸襟悅。披圖國頌颺。史臣誰汗簡。休應譜斯箱。

太一奉祠夜卽事

天極三元會。星精五福游。神光來集夜。邦祝此迎秋。導獻森威節。嚴真默翠幃。醴觴瓊借液。牲俎麵爲羞。藥簡空歌續。金支寶焰流。宰衣紛曳繡。僊駕儼居樓。降格雲頽席。歸歡電翼朝。種祠知漢德。時介萬靈休。送給事俞學士知宣州

駁議東曹重。修書祕府榮。緣何厭廬久。使作偃藩行。戒道熊文戟。騰裝鶴膝兵。堯雲迷闕曙。淮雨破舟程。竹契將恩遠。江波共政清。向愁臆岫好。誰賞謝宣城。

舍人院觀御篆紫微閣榜賜宴奏御

近署新層構。仙跼錫寶題。凝章下天漢。布畫儼星奎。榜勢虬檐負。繪華鳳押棲。崇儒推宴豆。觀象聳朝闈。

九張霽雪洽。三休賀雀迷。從茲河洛輿。併在紫垣西。

重陽節玉津園錫宴

紀節符陽序。承恩出上闌。廚均堯脯膳。優集漢觴歡。紫菊吹花耐。丹萸辟惡丸。秋光浮翠帟。雞鶩珥華冠。宮樹遙分杳。林荇且辨蘭。神池翻瑞鵠。帝竹隱歌鸞。煙闕雲中見。嚴城斗外看。欲知人意悅。霏霧滿歸鞍。

